

JUZÍÑAMUI ÑUEFUE SAN MARCOS LLOGAFUE

El Santo Evangelio Según San Marcos

Juan Bautista táizicimo lluáibite
(Mt 3.1-12; Lc 3.1-9, 15-17; Jn 1.19-28)

- 1** ¹ Juzíñamui Jitó Jesucristo lloga ñúefue bie izóí tainede.
² Jaiái uícodo Juzíñamui uai jino llóraima Isaías cuete:
Mai cacai, o uíécodo cue rafue llotímie orédicue, o jáille io ñue
ifóllena.
- ³ Táizicimo caillídímie uai ñue cacaide; daide:
Mai omoi Ocuíraima jaille io ñue finori; ie macalle io jáicina tuiñori,
—daide.
- ⁴ Afe izóí báutizaraima Juan táizicimo cíocaizaibite. Dinomo comini
jitáirede báutizaillena afémie ñue lluáibite. Iaioina daide:
—Omoi comeci ifue ñúefuena méidorediomoi. Ie mei
báutizarediomoi. Iemona Juzíñamui omoi comeci fiénidifuiái dóite,
—daide. ⁵ Iemona nana Judea énie imaci, Jerusalen comini diga, Juan
llógamo cacáreizaidiaioi. Cacáillano íaioi comécimo ite fiénidifuiái
uáfodo jino llotíaioi. Daif íaioi llua méífomo imani Jordámo Juan
báutizagaiaioi.
- ⁶ Juan jitaca iniroi camello itíraiaí finoína. Ie círaigi llaitáinafe igorai
finoína. Fíuaí rite; jazici ie cíiji jirófiredé. ⁷ Comínimo llócaillano daide:
—Fui cue méífodo bíitímie, iere cue baimo riire ocuífireitímie. Iemona
ie idai ico igai zuitánidicue, mei jofófene jamáimiedicueza. ⁸ Jae jáinoido
ómoína báutizadícue, ñuera iodo omoi jáiacana jino llóllena; mei íadi afe
bíitímie Ñuera Joréñodo ómoína úcaitaite, ñuera iodo éicitaiñeno ñue
omoi jáillena, —daif daide Juan.

Jesús báutizainafue
(Mt 3.13-17; Lc 3.21-22)

⁹Aféruillaído Jesús Nazarétmona bite. Afe Nazaret jofue Galilea éniemo ite. Billano Juan illánomo dúcide. Afénomo Juan íena Jordámo báutizade. ¹⁰Jáinoimona jino billa llezica Jesús mona túijicaillana ciode. Daje llezica Ñuera Joreño fíiciri izói Jesumo ana bíllana Jesús ciode. ¹¹Afe llezica monámona uai cácaaide; daide:
—O iere cue izíruiga Jitódio. Ori iere caimare iticue, —daide.

Taife Jesús facátate
(Mt 4.1-11; Lc 4.1-13)

¹²Afe méifodo raire Ñuera Joreño Jesuna táizicimo orede. ¹³Dinomo tóñega rílleniai cígimo Jesús cuarenta dígarui ite. Afénomo Satanás (Taife jíáifodo mámeciredimie) Jesús facátate. Aféruillaído Juzíñamui abi imaci ángeles dainámaci Jesús cánuaibítiaioi.

Jesús Galiléamo llófuiafue táiniaide
(Mt 4.12-17; Lc 4.14-15)

¹⁴Ie mei illaíma Herodes Báutizaráima Juan llavétate. Juan llavébilla mei, Jesús Galilea éniemo jaide. Jáillano Jesús, Juzíñamui ñuera rafue llujáide. ¹⁵Jesús bie izói daide:
—Ja aféruimo dúcide. Ianori íllamona Juzíñamui nana íemo jaináidimaci dáaziena caimare íllena gairítaibiteza. Iemona jíllonafue omoi ínuano, omoi comeci ífuiai méidori afémacimo dájena omoi jaináíllena, —daide.

Jesús cuatro dígamie facóramaci uáidote
(Mt 4.18-22; Lc 5.1-11)

¹⁶Jesús Galilea jorai fuédado mácajide. Jaillano Simona ciode ie ama Andrés díga. Facóraíma íaillinoi. Llójji jóraimo dotáfirediaillinoi. ¹⁷Jesús íaillinoína daide:
—Mai cuedo ómicoi bi. Chámuniaí ómicoi jenófirena izói, afe izói comini jenórainina ómicoína jóoneiticue, —daide. ¹⁸Raire íemona íaillinoi llójji fíianona, afémiedo jáidiaillinoi. ¹⁹Ie mei Jesús bai jabo jaillano Zebedeo jító, Santiágon a ciode, ie ama Juan díga. Iaiói llójji cúaidino, nocáe ero ráicana niródiaillinoi. ²⁰Jesús íaillinoi jíirite. Iaillinoi moo Zebedeo nocaemo fiénocaillano ie canóramaci díga, Jesudo jáidiaillinoi.

Capernaumo fiénide jóriairedimie Jesús jíllotaga
(Lc 4.31-37)

²¹Ja Capernaumo dúcidiaioi. Ie mei ocózinaillaruimo Jesús Juzíñamui uai llófuera como jofo llófuiaide. ²²Afémie llogáfueri fáigacaidiaioi.

Ua nibai ríimie izói ñue llófullofuede. Ocuícafue llófueraini afe daií llófuñediaioi. ²³Afe llezica Juzíñamui uai llófueracomo fiénidena jóriairedimie ite. ²⁴Afémie ja Jesumo caillide; daide:

—Nazaret ímie, Jesús, ¿ñifue cócomo illa? ¿Cai fatátaibitio? Ona onódicue. Juzíñamui faifuenidimiedio; afémie rafue ñue lluaíbitimiedio, —daide.

²⁵Iemo Jesús fiénide jóriaimo riire úrite; daide:

—¡Lláicai! Bímie fáicanocaillano oni jai, —daide.

²⁶Iemo fiénide jóriai afémiena izire docáitate. Ie mei jamánomo caillídemo afémiemona oni jaide. ²⁷Ie jira nana nairai jacínaitiaioi. Jira conímamo jicánotiaioi:

—¿Bie minica? ¿Minica bie como llófueinafue? Bie Jesumo riire ocuíllafue ite, fiénide jóriai oréllena. Afe fiénide jóriai afémiena ínofirediaioi, —daidíaiioi.

²⁸Ie jira Jesús mámece nana Galilea énie fuédado raire jica jalleide.

Jesús Simón Pedro jifaiño jíllotate

(Mt 8.14-15; Lc 4.38-39)

²⁹Juzíñamui uai llófueracomona jino billano, Jesús, Simón ie ama Andrés faillinoi icomo jaide, Santiago, Juan diga. ³⁰Dinomo Simón jifaiño abi cuaríllamona iníranomo bíide. Afengo irárenana Jesumo llotíaiioi. ³¹Iemona aféngomo ánozillano, Jesús afengo onoi llíinota, íena caifo naidánete. Afe llezica afengo abi cuarilla aféngomona llíicaide. Daje llezica jarire íaioi jitailla güille afengo bai íaioimo atide.

Jesús aillo iráredino jíllotate

(Mt 8.16-17; Lc 4.40-41)

³²Aféruído, jitoma ana zójicaidemo, ja nauíoicailla llezica, nana afénomo ite iráredino, fiénidena jóriairedino diga, Jesumo atídíaiioi. ³³Nana dino jofue nairai afeco naze fue ibírimo gairízitiaioi. ³⁴Jesús aillo íaioimo ite diga ie duico jíllotate. Afe llezica aillo fiénide jóriai Jesús jino comínimona orede, mei íadi Jesús afe jóriai úriñeillena íaioimona rairuide, mei afémiena onódíaiioiza.

Jesús Galiléamo llujáide

(Lc 4.42-44)

³⁵Ja monáioicaidemo, nai jítireoidemo, Jesús cazíllano jino jófuemona oni tii daidínomo jaide, dinomo Juzíñamuimo úrillena. ³⁶Afe mei Simón ie nabáñiairi Jesús jénuaidiaioi. ³⁷Baillánona íena daidíaiioi:

—Nana o jenódíaiioi, —daidíaiioi.

³⁸Iemo Jesús íaioina daide:

—Ainori itícuaimo mai cai jai, dinomo daje izói ñúefue cai llujáillena; mei afe jira jino bitícueza, —daide.

³⁹Daií Jesús nana Galiléado macade. Naga illánuiamo Juzíñamui uai llófuera como llócaide. Afe llezica comínimona fiénide jóríai jino orede.

Chíinaite izóidimie Jesús jíllotate

(Mt 8.1-4; Lc 5.12-16)

⁴⁰Jesumo chíinaite izóidimie ánozide. Ana dújuano daide:

—Cue o jíllotaiacaniadi cuena jíllotaredio, —daide.

⁴¹Ie jira Jesús afémiemo dúecaide. Jira ónoido jétano daide:

—Jii, ona jíllotaiacadícue. Mai o abi jácaiteza, —daide.

⁴²Daií dainamona afe duico iráredimiemona cióbicañena. Jae ñúemie.

⁴³Iemo Jesús afémie orede. Daje llezica riire ocuállano daide:

⁴⁴—¡Cacai! Bumo lloñeno iri. Dama lletáriraima sacerdote dainámiemo jaillano, o abi ácatari. Dáaruído Moisés jaiái ocuica abi duafue ráana, mai afémiemo izájiri. Iemona comini o abi jíllotana fidiitiaioi, —daide.

⁴⁵Mei íadi afémie jaillano nana comínimo afe ie jíllonafue llúájide. Iemo aillo comini Jesumo izire gairíoidiaioi. Ie jira ja Jesús bu jófuemo uáfodo jáinide; mei íadi jino jofue iñénanomo mácajide. Mei íadi nágaboiamona bizájidiaioi afémiena cfoillena.

Jesús tízitaitimie jíllotate

(Mt 9.1-8; Lc 5.17-26)

2 ¹Ie méifodo nano nígarui íllamona Jesús meine abido Capernaumo jaide. Afémie jofomo íllana ja fidídiaioi. ²Iemo aillo nairai ie jofomo gairídiaioi. Jofo comínina oruállamona iere rillírede; ja naze fuemo íaioi illino iñede. Iaióimo Juzíñamui úrillafue Jesús jino llote. ³Iemo cuatro dígamie tízitaitimie atídiaioi. ⁴Iere comini íllaza, Jesús illánomo dúcinide. Ie jira jofo emódomo caifo jaillano, Jesús illa llezícamo jofo emodo íbáicano cúcoidiaioi. Cúcoianona aféfodo tízitaitimie ana agüínetiaioi, naa afémie bírallu diga. ⁵Afémaci comeci ínuana cfoillano, Jesús tízitaitimiena daide:

—Jitó, o fiénidífue jae ñue dófide, —daide.

⁶Dáarie ocuífufue llófueraíni, dinomo ráiidino, íaioi comeci facáoidiaioi: ⁷“¿Níbái mei bímie daií úrite? Juzíñamuina fiéni úrite. Dama Juzíñamui fiénidífufuena dua. Abi díne bu Juzíñamui izóí fiénidífufuena doñena.” ⁸Mei íadi dama Jesús ie comécido afémaci comeci úrillafuena onode. Jira daide:

—¿Níbái mei omoi comeci daií facádiomoi? ⁹¿Ñíie iere júanina iráredimiena daiíllena: “O fiénidífue dófite,” níbai jíáifodo daina: “Náidacai, o bíra llínota ui, mai maca”? ¿Ñíie iere júanina? ¹⁰Ie jira jíáifufuena ómoimo fidítaitícue. Bíníemo comini fiénidífufuina oni muiñólle ríno cuemo ite. Nanoide íima Jitódícueza, —daide. Iemo tízitaitimiena juare daináfufuena daide:

11—Ona daidicue: Caifo náidacai. O bírallu llíinota mai o jofomo jairi, —daide.

12 Ja iráredimie raire náidacaillano ie bírallu llíinote. Llínuano dinómona jino jaide. Ie jáillana nana comini ciódiaioi. Jira áferi fáigacaidiaioi. Daje llezica Juzíñamuina cáimadotiaioi. Daidíaioi:

—Jaca daiítadifuenta ciórainidicai, Juzíñamui o iere jamánomoidimedio. Mai Juzíñamuimo cai ióbilli, —daidíaioi.

Jesús Leví uáidote
(Mt 9.9-13; Lc 5.27-32)

13 Ie mei Jesús meine abido jorai fuédamo jaide. Nana comini íemo áinozidiaioimo, afémie íaioina llófuete. 14 Jesús mácajilla llezica, Levína ciode. Leví Alfeo jitó. Afémie gobierno íbátaga úcube llíinoranomo ráiide afe úcube llíinollena. Iemo Jesús íena daide:

—Cuedo bi, —daide. Jira Leví náidacaillano afémiedo jaide.

15 Afe méifomo Jesús Leví jofomo güizájide. Dinomo aillo jíáie gobierno íbátaga úcube llíinoraímaci Jesús dáanomo güirábanimo ráiiediaioi naa fiénidimaciri. Mei iere áillomaci afe izóidino afémiedo jáidino. Afe dáanomo Jesús llófuegamaci ráiidiaioi. 16 Mei íadi dáarie ocuífafue llófueraini fariséuai diga, Jesús nana afe fiénidimaci diga naa íáiruiga íbátaga úcube llíinoraímaciri dáanomo güillana ciódiaioi. Iemona Jesús llófuegamacina daidíaioi:

—¿Nibái mei omoi llófueraima afe íáiruiga íbátaga úcube llíinoraímaci diga güífiredede, jirófirede? Daje izói, ¿nibái mei jíáie fiénidino diga güífiredede? —daidíaioi.

17 Aféfuena Jesús cacáillanona duera ráfuedo íaioina daide, nie ícoinia mei íáiruigamaci diga ie güífirénana íaioi onóillena. Be niífue:

—Íránidimaci manóriraimana jitáíñediaioi; dani duícotaidino da manóriraimana jítaina. Mei núemacimo cue uáiduaibiñedicue. Fiénidino uáiduaibiticue afémaci jíllollena, —daide.

Daa mona güillena fímairillena Jesumo jicánotiaioi
(Mt 9.14-17; Lc 5.33-39)

18 Jíáiruideo Bántizaraima Juaado jáidino fariséuaido jáidino diga nana güiñeno fímairitiaioi. Aféruimo dámierie Jesumo jicánuaibitiaioi:

—¿Nibái mei Juaado jáidino fariséuaido jáidino diga nana güiñeno fímairitiaioi, mei íadi o llófuegamaci fímairiñediaioi? —daidíaioi.

19 Jesús uai uano ráfueemo mámiumo íaioi llófuete, afémiedo jáidino finócana jíáimaci féinino onótallena. Daide:

—Airenafueemo uáidogamaciri ringo otímie íaioimo illa llezica ¿meita fímairirediaioi? ¿Níbái fímairinidiaioi? Ringo otímie íaioimo illa llezica jaca fímairinidiaioi. 20 Mei íadi ringo otímie íaioimona bairóbicailliruimo dúciite; aféruimo uáfuena fímairitiaioi.

²¹Iemo daje izói ñue onótallena jiáie ráfue mo mámiano íaioi llófuete; daide:

—Buna jaiáicuiro ináicuiro cúaidinomo comue jofo gáijicaiñede iniroi nitácapu dájemo jofo jillíñede, mei comue gáijicaiñede nitácapu afe jaiáicuirona onífenedo nane ráataitade. Iemona cúaidino jae iere aillóite.

²²Daje izói comue vino jácara igorai ie finoína botéllamo jóonenide. Jácara botéllamo comue vino jóoneadi, afétella bójicaide. Iemo nana vino táinomo tójicaide. Daje izói afe igorai finoína botella bójicaillano meine finónide. Ie jira comue vino comue igorai finoína botéllamo jóonerede, —daide.

Jesús llófuegamaci ocózinai llaruimo trigo llizíllaticiai tícoidiaioi

(Mt 12.1-8; Lc 6.1-5)

²³Daa mona ocózinai llaruimo Jesús ríganíai cígido mácajide ie llófuegamaci diga. Afénodo jaillano ie llófuegamaci arrozna eroide trigo llizíllaticiai ja tícoiaidiaioi. ²⁴Iemo fariséuai íena daidiaioi:

—¡Erocai! ¿Nibái mei o llófuegamaci rairúrede jetádiaioi? Afena ocózinai llaruimo rairúrede, —daidiaioi.

^{25,26}Mei íadi afémie íaioína daide:

—¿Jaca nibái David finócana facadoñediomoi? Afémie naa ie nabáiníairi güille íena llezica, júbietaillano Juzíñamui jofomo jaide. Ua Abiatar lletáriraini illáimana illáruido, David jofo jaide. Afe jofo eromo Juzíñamuimo eneno mameca rairúrede panes ite. Dani Juzíñamui lletáriraini áfena güirena; jiáimacimona afe rairúrede. Afe panes David uánona güite; ie mei ie nabáiníaimo fecade.

²⁷Iemo nane Jesús íaioína daide:

—Hima ocózinai llaruimo íena fñoñega, mei íadi ocózinai llaruimo iima íena mameca. ²⁸Jira Nanoide hima Jitona cue íllamona, ocózinai llaruimo ocúredicue. Aferui Náamadícue, —daide.

Jesús ónoína llirídímie jillotate

(Mt 12.9-14; Lc 6.6-11)

3 ¹Jesús dáanomo Juzíñamui uai llófueriracomo jofo jaide. Afénomo ónoína llirídímie ite. ²Afénomo itínomona Jesumo iere eróioidiaioi, ocózinai llaruimo Jesús bímiéna jillotajana onóillena, áfedo Jesumo fiénidífue jítállena. ³Ie jira ónoína llirídímie Jesús daide:

—Náidacai; jofo bené cígimo bi, —daide.

⁴Dáanomo jiáimacimo jicánote:

—¿Minícana ocózinai llaruimo ómoiri finóredicue? ¿Nibái fiénidífue fñoitícue, nibái núefue fñoitícue? ¿Nibái omoi jillotaitícue, nibái omoi títaitícue? —daide Jesús.

Mei íadi afémie ja uai onéidiaioi. ⁵Jira Jesús íaioiri rícaide. Daje izói zuure íaioimo eroide, mei íaioi onóiacañena jira. Iemo afe íimana daide:

—Mai, o onoi zúitacai, —daide.

Ie jira ie onoi zuitácaide. Iemona ja ie onoi ñuera. ⁶Afe mei fariséuai, naa Herodes imaci diga jino jaillano, Jesús fallifue raire mamé diaioi.

Aillo nairai jorai fuédamo gairí diaioi

⁷Jesús ie llófuegamaci diga, jorai fuédamo jaide. Iemo aillo nairai Galilea imaci, íedo jáidiaioi. ⁸Mei áillue ráfuena, afémie finócafuiaina, fidíillano aillo Judea énie imaci bite, Jerusalen imaci diga. Daje izói Idumea énie imaci bite; Jordán imani ruicáfelle imaci bite; Tiro, Sidón diga áinori itímaci bite. Nana dáanomo bití diaioi; Jesús eróizaibití diaioi. ⁹Ie jira Jesús ie llófuegamaci ocuide nocáe atíllena, aillo nairai iere rillire íemo ñeillena. ¹⁰Mei iere aillo nairai jíllotate. Iemona nana jíáie iráredino rillire afémiemo gairí diaioi, ie jetánollena. ¹¹Iemo aféno mo itínomona dáarie fieni joría rediaioi. Afémiena cióillanona, afémie uíecomo ana dújudiaioi. Dújuillano caillí oicaidiaioi:

—O Juzíñamui Jitódio, —daide.

¹²Mei íadi Jesús fiénide joría ina izire rairuide; daide:

—Juzíñamui Jitona cue íllana daiñeno iri, —daide.

Jesús doce dígamie nizede, oni íaioi óriano afémaci ie ñúefue llujáillena
(Mt 10.1-4; Lc 6.12-16)

¹³Ie mei Jesús ídumo caifo jaide. Dinomo jaillano Jesús comeci óiacagamie dígamie nizede. Afémiemo bití diaioi. ¹⁴Doce dígamie Jesús níziano ote. Afémaci ie oréllimacina Jesús mamede. Ua íaioina ote ie abimo íllena, ie uai llóitínona jáillena. ¹⁵Dáanomo ríinona igáiaioi iráredino jíllotallena, íemo jíái fiénide joría i jino oréllena.

¹⁶Afe nizécamací doce dígamie. Afémaci mámeciaí: Simón, nímiemo Jesús jíáie mámecina jíitaca, Pedro; ¹⁷ie mei Zebedeo jíitó íaillinoi Santiago ie ama Juan diga. Afe íaillinoimo Jesús jíáie mámecí jíitade, Boanerges. Afe mámecí daína: Iocimie íaillinoi. ¹⁸Ie emódomo jíáie nizécamací mámeciaí: Andrés, Felipe, Bartolomé, Mateo, Tomás, Alfeo jíitó Jacobo, Tadeo, íemo íere Járidotímacimo jaináidímie Simón, ¹⁹ie mei Judas Iscariote. Afémie méifodo Jesús ie éoidinomo fécaitimie.

Fiénide joría i ríino Jesumo ite táinona daiífirediaioi
(Mt 12.22-32; Lc 11.14-23; 12.10)

Afe méifomo Jesús ie llófuegamaci diga jofomo jofo jaide. ²⁰Nane dáanomo aillo nairai gairízítiaioi. Iemona Cristo ie nizécano diga ja güín diaioi. ²¹Afue fidíillano ie onoiga nabáíñiaí bití diaioi ie oni uíllena, mei afémie uáírítai de daidíaioi.

²²Daje llezica Jerusalémona bite ocuífue llófueraíni, bie izói íeri úritiaioi; daidíaioi:

—Bímie Beelzebumo jaináidimie. Afe Beelzebú fiénide jóriai illaima, (jíáici ie mámeçi Taife). Afe Beelzebú ríinodo fiénide jóriai afémie jino juude, —daidíaioi.

²³ Ie jira Jesús íaioi jíirite. Jíirilla mei, onoiga ráfuiái íaioi mo llote:

—¿Nie izói afe Taifedo Taife jíurede? ¡Jíúinide! ²⁴ Daa nairai énenorie jíáiziena oni bójicaillano are íneitiaoi, mei nágazie conima diga fuirífiereidiaoi. ²⁵ Daje izói eneno dani jofóredino íaioi bójicaiaði, are íneitiaoi. ²⁶ Mei jira Taife dama ie diga fuiríadi, íemona dama ie bójicaiaði, afémie are íneite. Ua áfedo fúbicaite.

²⁷ Máirimie jofomo, buna jofo jáinide, ie ráaie bairóllena. Dama afémie máia méifomo jofo jaillano bairórega.

²⁸ ‘Uáfuenta ómoimo lloticue. Comini fiénidífuiai nana dórede, daje izói nana íaioi fue borefue diga dórede. ²⁹ Mei íadi Juzíñamui Ñuera Joréño mo fieni úritimie ie fiénidífuiai jaca ua oni dónide. Dama ie ícoina jaca íemo jíite, —daide.

³⁰ Daií daide, mei afémie fiénidena jóriairede daidíaioi.

Jesús ei ie ámatiai diga Jesuna uáiduaíbitiaoi

(Mt 12.46-50; Lc 8.19-21)

³¹ Iemo Jesús ei ie ámatiai diga dúcidiaoi, mei íadi jino fiébidiaoi. Dínómona jofo gairídinona daidíaioi:

—Mai ie jíirizai, —daidíaioi. ³² Jesús abido ráiiedino íena daidíaioi:

—O ei, o ámatiai diga jino ite. O jénuaíbitiaoi, —daidíaioi.

³³ Mei afémie daide:

—¿Buoí cue eina? ¿Buoí cue ámatiaina? —daide. ³⁴ Afe mei ie abido ráiiedinomo eróillano daide:

—Be mei cue éitiai. Be mei cue ámatiai. ³⁵ Mei Juzíñamui ocufafuena jeire otónona bie cue ama, bie cue miringo, bie cue ei, —daide.

Ríjiraíma ie ifue

(Mt 13.1-9; Lc 8.4-8)

4 ¹ Meine dáanomo jorai fuédamo Jesús llófuete. Ie illánomo aillo nairai gairídiaoi. Jamánomo aillo comini illa jira, Jesús jóraimo ite nocaemo ráiizaide. Nana comini guamáemo fiébicaidiaoi. ² Iemo diga ráfuiái íaioi mo llófuete. Ua íaioi onóigafuiaido llote. Ie llogáuai daide:

³ —Bíemo cácarei: Ríjiraíma ríjizaide. ⁴ Ricana jailla llezica dáarie rillájiai iodo cocide. Iemo ófocuziai áfena güizáíbitiaoi. ⁵ Jíáie rillájiai nofíciaino énie íñénanomo cocide. Afe rigájiai raire zocade, mei afe énie figo íñédeza. ⁶ Mei íadi jítoma billa llezica uzídiaoi. Jáinao íñénamona dúidiaoi. ⁷ Jíáie rillájiai éegiai cígimo cocide. Afe éegiai zoca anamo itábicaidiaoi. Meita jaca llizíñediaoi. ⁸ Mei íadi jíáie rillájiai ñuera éniemo baíide. Zocádiaoi; ie mei ñue comúdiaoi. Mei ñue llizídiaoi. Daji rígamona zocano aillo llizide; jíáijiai afe baimo llizide; jíáijiai ie baimo ua aillo jamánomo llizide.

⁹Ie mei íaioina daide:

—Omoimona cacáacadino cacai, —daide.

Afémie nibai íaioi onóigafuiai cígido llófuefirede

(Mt 13.10-17; Lc 8.9-10)

¹⁰Afe mei Jesús dama fiébilla llezica, afémie áinori itino ie doce llófuegamaci diga íemo jicánotiaioi:

—Bie onóigafue ¿nie izói daiíacade? —daiíai. ¹¹Jira íaioina daide:

—Juzíñamui ie uáfodo onóñega illáimana illirui rafue ómoimo llóiacade. Afedo ja lloflómoi. Mei íadi jino ite íemo jaináñedino jaca íaioi onóigafuiaiido llogáiaioi. ¹²Daií cue llófuegaiaioi, íaioi cíóillano nai uina cíóñedimaci izói íaioi fiébicaillena. Afe izói cácaitiaioi íadi ónoñeitiaioi. Daií llófuegaiaioi íaioi comeci ífue méidoñeillena; íemo jíái íaioi comeci fiénidifuiái dófcáiñeillena.

Jesús afe rjiraima onóigafue ja ua jino llote

(Mt 13.18-23; Lc 8.11-15)

¹³Dáanomo Jesús jicánote:

—¿Omoi bie onóigafue onóñediomoi? ¿Nie izói daií mei jíáiena ónoitiomoi?

¹⁴Afe riraima Juzíñamui ñuefue lloiraíma izóidimie. ¹⁵Dáarie comini afe iodo cocide rigájiaí izóidiaioi. Afémaci afe cue llogáfuemo cacáreidiaioi. Mei íadi áfena cacáillanona, Taiíe íaioi comécimo lloga ráfuena raíre báiruabite. ¹⁶Jíái comini afe noñciaímo énie inénanomo cocide rigájiaí izóidiaioi. Afe cue lloga uaina cacáillano raíre caímare llínotiaioi. ¹⁷Mei íadi figo jáinaonide rigájiaí izóidiaioiza, dama íanori íllado ñue itíai. Afe mei lloga uai ícoínia facátafuiai bíadi, nibai duere íaioi zefuíadi, íaioi íinoñenamona íaioimo lloga uaina raíre meine abido zóofetiaioi. ¹⁸Jíái comini afe éegiaí cígiri cocide rigájiaí izóidiaioi. Lloga uaina cacádiaioi, ¹⁹mei íadi bie éniemo ite raamo comécíillano aféfuiaímo iere jarítaitiaioi. Bínie raa íaioina jífuete. Iemona jamánomo aillo ráaniaina óiacadiaioi. Nana bie jofo comeci óiacaigafue íaioimo lloga uaina niné féítate. Ja mei féítagaza; ja ie comécimo llizilla izói inede. ²⁰Mei íadi dámierie lloga uaina cacáillano áfena ñue jeire otíaioi. Afémaci ñuera éniemo cocide rigájiaí izóidiaioi. Afe izói íaioi íllamona, ñúefuiaína ñue aite izói finódiaioi. Afémacimona dáarie afe daji rígamona zocano aillo llizilla izóidiaioi. Iaióimona jíáímaci afe baímo llizilla izóidiaioi. Jíáímaci afe ie baímo aillo jamánomo llizilla izóidiaioi.

Mechera iedo cai onóigafue

(Lc 8.16-18)

²¹Jesús nai úrite; íaioina daide:

—¿Nogo anamo jóonellena mechera meita atíca? ¡Atiñega! ¿Daje izói inírabani anamo rainállena mechera atícaza? ¡Atiñega! Naga mechera

caifo jica raináfírega, ñue egáñollena. ²²Mei ja nana báinino ite raa jino uáfodo cfoacaitade. Daje izói nana jáanoga rafue ñue onóigafuena jáite.

²³Omoimona cacáacadino cácarei.

²⁴Afe emódomo íaioina daide:

—Omoi cacánafuena ñue omoi onoiri. Naga raa omoi faca izói, afe izói Juzíñamui íbana ómoimo fácaiteza. Ie mei afe baimo afémie jamánomo aillo ómoimo íte, mei ñue cacádiomoiza. ²⁵Mei íeredimiemo jíaiena ille; mei íadi íénidimiemon, íemo due ite raa meine bairolle.

Eniemo rigáji zócajamo mameca rafue

²⁶Nane dáanomo daide Jesús:

—Juzíñamui illáimana illirui bie izoide. Daa iima éniemo rigájiai júdaia izoide. ²⁷Rillano afémie abina íniaide. Ie mei cazide. Naio mona díga jaide. Afe llezica rigájiai zocade; zócano ñue zairide, mei íadi nie izói comuídeza afémie onóñede. ²⁸Mei ñuera éniemo rigájiai énie zocátaga. Nano fueñe ie ina jino billa, ie mei llizíllachecoí comuide, ie mei afe llizíllachecoí íjaiña oruide. ²⁹Ja ie jeia llezica, riraíma afe llizíllajiaina uájide. Mei afe jofo uáruimo ja dúcideza.

Mostaza llizíllaji iedo onoiga rafue

(Mt 13.31-32; Lc 13.18-19)

³⁰Jesús nane daide:

—Juzíñamui illáimana illarui, ¿nié izoide? ¿Niie onóigafuedo daje izói fácaiticaí? ³¹Juzíñamui illáimana illarui mostaza llizíllajiai rilla izoide. Afe íjai nana énie llizíllajiaimona da jaca iere jéjinide. ³²Mei íadi rígamona, nana raróciaí ie baimo áillo nana jaide. Ie ícairuai áarie. Iemona féedino ófocuziai ie ícairuaimo ráinazaidiaioí. Afe jánamo uái ráiiediaioí, —daí Jesús daide.

Jesús jaca onoiga ráfuaímo mámano llófuefiredo

(Mt 13.34-35)

³³Daí Jesús ie jino llóiacagafuiai aillo bie izói onóigafuaído jóonecana uite. Íaioí onóillinomo daí llócaide. ³⁴Onóigafue llóñeniadi, afémacina llófueñede. Mei íadi Jesús ie llófuegamaci díga oni eneno dani íaioí illa llezica nana áfena jino íaioímo llote.

Jesús jairifo naa jorai bagua díga llícaítade

(Mt 8.23-27; Lc 8.22-25)

³⁵Aferui nauídemo Jesús ie llófuegamacina daide:

—Jorai ruícafenemo mai cai jai, —daide.

³⁶Ie mei comíni fíiano, Jesús uitíai. Afémie illácaedo jáidiaioí. Daje llezica jíaiacaíado afémiedo jáidiaioí. ³⁷Iemo iere rírede jairifo

náidacaide. Iemona jorai bagua nocáe eromo cocide. Uafue, nocáe jáinoina oruúbicaide. ³⁸Afe llezica Jesús moífecaemo ifo jobéracadamo bíicana inide. Afémie cazítajano íena daidíaioi:

—iLlófueraima! ¿O caina ráiruñedio? ¡Buízaidicai! —daidíaioi.

³⁹Iemo Jesús náidacaillano jairifo lletade. Llétajano jóraina daide:

—iLlíicai! ¡Uái ii! —daide. Iemona jairifo llíicaide. Nana ñue jáfuericaide. ⁴⁰Ie mei ie llófuegamacina daide:

—¿Nibái mei iere jacíruitiomoi? ¿Nibai nai Juzíñamuimo íinoñediomoi? —daide.

⁴¹Iadi jairifo ie llíicaitari iere jacínaitiaioi. Dani conímamo úritiaioi:

—¿Bie nímie? ¡Jairifo jorai diga, afémie uaina jeire ote! —daidíaioi.

Gerasa éniemo fiénidena jóriaredimie Jesús jíllotate

(Mt 8.28-34; Lc 8.26-39)

5 ¹Jae jorai ruicáfellemo ite Gadara éniemo dúcidiaioi. ²Jesús nocáemona jino jáidemo, raiáfuaí illánomo ífirede fiénidena jóriaredimie Jesumo bite. ³Afémie raiáfuaí illánomo ífirede. Aféruillaido afémie jaca buna llójeodo cuinánide. ⁴Diga ícaíño llójeodo idai onoi diga íena cuinádiaioi, mei íadi afémie afe llójeona titada jaca jéenino titúbite. Jaca buna afémiena anáfenonide. ⁵Mona naio diga afémie afénomo macáfiredo. Iduaido caillícana jaide naa raiáfuaído. Daje llezica nofficaído ie abi bofécade. ⁶Iadi Jesuna jicana ciode; cfoillano, aizícana bite. Billano Jesús anamo afémie ie caiñícido ana dújude. ⁷Jesumo riire lléjecaide:

—¿Nibái cuemo jíricaidio? O Jesúsio; jamánomo caifoide Juzíñamui Jitódio. Juzíñamui mámecido omo jicádicue duere cue zéfuiñellena, —daide. ⁸Daií lléjecaide, mei nano fueñe Jesús íena dáideza:

—iFiénide jóriai, bie ímmamona oni jai! —daide. ⁹Jesús íemo jicánote:

—¿O mei búdio? —daide. Uai ote:

—Cue mámecei Aillo Dáanomo Íráicano, mei áillomacídicaiza, —daide.

¹⁰Iemo fiénide jóriai Jesumo izire jicade, afe éniemona jica íaioina oni óreiñellena. ¹¹Afe íduai áinomo aillo tóica meróniai güífiredo. ¹²Ie jira fiénide jóriai Jesumo jicade:

—Afe meróniaimo cai oreri, dinomo cai ílleza, —daidíaioi.

¹³Ie mei Jesús faíríote. Iemo fiénide jóriai ímmamona jino meróniaimo jáidiaioi. Mena mil tóinai ite. Nana afe tóinai jorai ígodado aizida cocídiaioi. Iemona jóraimo coróbaitiaioi.

¹⁴Ie jira meróniai úíñoraímaci jacínailano botádiaioi. Afe rafue íaioi jófuemo llujíjidiaioi naa jínoidímaci diga. Ie jira afe finócafueмо comini eróizaitiaioi. ¹⁵Jesús illánomo dúciillano nauí fiénidena jóriaredimiena ciódiaioi. Mei íadi ja birui afémie ñue uái ráiide. Ja ínícuirona jítaoide. Ja ñue abina onode. Nana comini jacíruitiaioi. ¹⁶Ie

mei cióдино navi fiénidena jóriairedimiemo finócafueña llujídiaioi. Daje izói meróniaimo finócafue llotíaioi. ¹⁷Ie mei Jesumo izire jícajidiaioi íaioi éniemona afémie oni jáillena.

¹⁸Jesús meine nocáe eromo jailla llezica, navi fiénidena jóriaina ogámie Jesús díga íllena izire jicade. ¹⁹Mei íadi Jesús fairioñede. Afémiena daide:

—Mai o jofomo jai. O comínimo nana omo cue finócafue o llujíjiri. O Ocuíraimadicueza. Omo cue dúcaillafue llujíjiri, —daide Jesús.

²⁰Ie jira afémie jaillano nana Jesús afémiemo finócafue llujíjide. Uafue nana Decápolis éniemo llujíjide. Nana comini aféfuerei fáigacaidiaioi.

Jairo jiza jíllotafue
(Mt 9.18-26; Lc 8.40-56)

²¹Jesús meine jorai ruícafenemo nocaedo jáidemo, aillo comini Jesús illánomo gairízaibitiaioi. Afémie díno jorai fuédamo fiébide. ²²Iemo Juzíñamui uai llófueriraco illáinimona dámie dúcide. Afémie mámecei Jairo. Jesuna cióillano ie ídaímo bíjicaide. ²³Daje llezica izire jicade:

—Cue jiza tíacade. O onoi cue jízamo bítaibi, ie jílloillega, ie tíñilleza, —daide.

²⁴Iemona Jesús afémie díga jaide. Ie llezica aillo comini afémiedo rillire jáidiaioi. ²⁵Afémaci cígimo daa ringo íráredingo ite. Doce díga fimona dícotaite. ²⁶Aillo manórirainimona duere zéfuide. Afe manórirainimo afengo úcube nana fuite. Iadi jaca íñoñede, mei íadi jamánomo írárede. Ua iere ana jaide. ²⁷Navi jíáimaci Jesudo úrillafuena cacáillano, afe ringo ódana comini cígido Jesumo ánozide. Iemo afémie ínícuro jetánuaide. ²⁸Afe úcori afengo comeci anado daide; “Ie ínícuro cue jetáadi jíllotícue,” daide. ²⁹Ie mei ínícuro jetaa llezica afengo die tótaja llícaide. Afe llezica ie írárena jílluamona afengo abi ñue cacaide. ³⁰Ie mei Jesús onóbicaide. Uafue, ie ríinodo da come jíllotaga afémie raire fidide. Ie jira comini cígido jino éroicaillano jicánote:

—¿Mei bu cue ínícuro jetaa? —daide. ³¹Iemo ie llófuegamaci afémiena daide:

—¿Aillo comini rillire fñuana cióñedio? ¿Ñibái mei bu o ínícuro jetaa jicánotio? —daidíaioi.

³²Mei íadi Jesús nágafene erórifide afémie ínícuro jetádingona cióillena. ³³Ie mei afengo jágieri cuidírite. Aféngomo finócafueña onóillano, Jesús uícomo ana bíjicaizaibite. Afengo rafue nana afémiemo uafuena jino llote. ³⁴Jira Jesús daide:

—Eicango, o comécido ñue ínotio, jira jíllodio. Mai jai. Jaillano uái o iri. O írárenamona ja jíllodioza, —daide.

³⁵Jesús nai úritemo, dáarie comini illaíma Jairo jofómoma bitíaioi. Dúengo moomo lluaíbitiaioi:

—O jiza ja tíide. ¿Nibái mei are llófueraima ifoci daidódio? —daidíai. ³⁶Mei íadi Jesús íai. Uai jeire oñeno, llófueriraco illaima Jáirona daide:

—Jacíruñeno iri. Dama o comécido íinori, —daide.

³⁷Iemo Jesús nana comini íedo jáiñellena rairuide. Dama Pedro, Santiago, ie ama Juan díga uite. ³⁸Llófueriraco illaima jofomo dúciillano, Jesús aillo comini faillíñainana cacade; nana cáillicai illa énaillana cacade. ³⁹Jofo jaillano Jesús daide:

—¿Nibái mei iere faillíñaidiomoi? ¿Nibái mei iere éediomoi? Afeza tíiñedeza; fia inide, —daide.

⁴⁰Iemona afémieri tadáidíai. Ie mei Jesús nana íai. Jino orede. Dama jiza moo, afengo ei, íedo bitímaci díga jofo uite. Jiza illácomo jofo jáidíai. ⁴¹Jiza onoi llínuano daide:

—Talita, cumi—. Aféuai dobáicana llote: “Jiza, ona daidícué, náidacai.”

⁴²Daí dáinamona afengo raire náidacaide. Náidacaillano macade; mei afengo doce díga fimona íteza. Aferi comini iere fágacaidíai. ⁴³Mei íadi Jesús: —Afe fue bumo lloñeno iri, —daide. Daí ocuide. Afe llezica afe ringoza ecállena íai. Ocuide.

Jesús Nazaremo jailla

(Mt 13.53-58; Lc 4.16-30)

6 ¹Dinómona Jesús ie éniemo jaide. Ie llófuegamaci íedo jáidíai. ²Ocózinaillaruimo dúciillanona Juzíñamui uai llófueriracomo llófui. Aillo comini fena cacáreidíai. Iemona fena jacíruicana fágacaidíai. Daidíai:

—¿Ninómona bímie nana bie ráfui. Onode? ¿Mínica bie onónafue femo ite? ¿Nie izói afémie bie aillo uaido dáinamona comútaga raa comútarede? ³Mei bímie afe aménado táijiraima, ¿ero ua? Afémie María jitoza onódicai, ¿ero ua? Daje izói afémie ámatíai Santiago, José, Judas, Simón dígadeza onódicai. Iemo ie miríngotíai nai cai cígimo íllana onódicai, —daidíai.

Iemona afémaci Jesús uaina náfueacañediaí. ⁴Iemo Jesús íai. Daide:

—Nana jíai comini, Juzíñamui uai jino llóraimana ñue jíruítiaí. Mei íadi afe llóraima énie imaci, íezie imaci díga, figo fena jíruíñediaí. Daje izói ie jofo imaci fena jíruíñediaí, —daide.

⁵Ie jira afénomo jamánomo aillo fia uaido dáinamona comútaga ráfui. Iemona comútanide. Due iráredinomo ie onoi bítanona jíllotate. ⁶Mei íadi nabémaci íñoñenari afémie fágacaide. Ie mei Jesús áinori ite jófuedo llófuecana uite.

Jesús ie doce dígamie oni jíainomo óriano llotátate

(Mt 10.5-15; Lc 9.1-6)

⁷Jesús ie doce dígade llófuegamaci uáidote. Uáiduano ménamierie íai. Orede. Afe llezica Jesús afe íai. Iemona ie ríno iga, fiénide joríaí jino oréllena. ⁸Ie llófuegamacina ocuide:

—Omoi jaille iodo ráiñuái jiáie minícana uiñeno iri. Daa omoi jiguída diga jairi. Tura uiñeno iri. Pan úcube diga uiñeno iri. ⁹Omoi idai ico jitada jairi. Mena caifófecuiro uiñeno iri, dama o jitáoigacuiro uiri, —daide. ¹⁰Iemo nane íaioina daide:

—Nicomo o jáiadi, dinó o fiébiri; ua afe éniemona jiáinomo o jáiacana llezica dinó o fiébiri. ¹¹Jiáicomo omoi jáiadi, ómoína íaioi llínoñeniadi, afénomona jairi. Daje izói o uai cacáacañenomona jairi. Jaillano, o idai icomo ite eníchoma jino íaioimo teténori, daií íaioi finócafueмо o jiéruñenana jino llóitio. Uáfueña omoi lloticue: Uire duere finóbilliruimo dúcia llezica, ómoína llínoñedino jamánomo duere finóbitiaioi. Mei íadi Sodoma comini Gomorra comini diga figo duere finóbiñeitiaioi, —daide.

¹²Iemo ie llófuegamaci jino jáidiaioi. Jaillano comini llotíaioi:

—Mai omoi começi ifue meídori, —daidíaioi. ¹³Daje llezica aillo fiénide joríaí jino orédiaioi. Iráredinomo cáiredijina due jónetiaioi; íemona jíllodiaioi.

Juan Bautista tíllafue

(Mt 14.1-12; Lc 9.7-9)

¹⁴Illaima Herodes aféfuaiña como fidide. Mei nana comini Jesús jalléinana onódiaioiza. Dáarie daidíaioi:

—Juan Bautista tíide íadi meine abido cáadimiena jaide. Iemona bie ríino afémiemo ite, —daidíaioi.

¹⁵Jiáimaci daidíaioi:

—Bie Juzíñamui uai llóraima Elías, —daidíaioi.

Nane jiáimaci daidíaioi:

—Jaiái Juzíñamui uai jino llóraini izoide bímie jiáie Juzíñamui uai llóraima, —daidíaioi.

¹⁶Herodes áfena cacáillano daide:

—Bímie ifona cue jaitátagamie Juan. Ja birui tíllanomona meine abido caade, —daide.

¹⁷Herodes ama Felipe; ie ofaiño Herodías, mei íadi Herodes afengo ie aina ote. Afe Herodías ícoína Herodes Juan jae llavétate. Afe llezica íena llavéracomo maitátate. ¹⁸Mei nauí Juan Heródemo llógaza:

—O ofaiño o aina ónidio; áfena rairuírede, —daide.

¹⁹Ie jira Herodías Juamo éoicana eroide. Iena fáiacade, íadi íena fánide. ²⁰Herodes afémie comécina jaícina ñue jóidimienana onode; iere ñuemienana onode. Núfuedo íena jacíruite. Ie jira afengo íena fiéni finótañede. Herodes Juan llogafue nai figo onóñede, íadi caimare íemo cacáreide. ²¹Mei íadi Herodías jiáifuemo uíbicaide. Herodes jocóinamona jiáie fimona fuilláruimo dúcide. Jira aféruído Herodes cumpleaños rafue finode. Nana ie illaini, jabóllaini, Galilea ocuíraini diga afénomo gairídiaioi, mei Herodes uáidogaiaioiza. ²²Dinomo Herodías jiza jofa

jaillano zaite. Afengo záillari Herodes ióbide; daje izói nana ie diga güizáibitino ióbidiaioi. Iemona illaima Herodes aféngona daide:

—O jicáacaiga raa cuemo jica. Omo íitícué, —daide.

²³Ríirede uaido nana afengo jicalle raa ie fecállena íaioi uiécomo llote: “Nana cuemo jainaide éniemona júbene o jitailla díeze omo llóitícué,” daide. ²⁴Afengo jaillano ie eina daide:

—¿Minica jícaítícué? —daide.

Afengo daide:

—Mai, Juan Bautista ifoci jica, —daide.

²⁵Afe ringoza jarire illaima illánomo jofa jaide; íena daide:

—Raire plato eromo Juan Bautista ifoci jóoneta cuemo ine, —daide.

²⁶Iemona illaima iere zúureficaide. Mei ja ríirede uaido llógaza afengo jícácana afémie jáanoiacañede. Daje llezica nana ie uáidogamaci cacádiaioi. Ie jira jáanoiacañede. ²⁷Ie jira afe llezica ie abi úíñoraíma raire llavérracomo orede, Juan ifoci atállena. ²⁸Afe abi úíñoraíma llavérracomo jaillano, Juan ifoci jáitano plátomo jóoneta atide. Afémie aféngomo izáibite. Iemo ie eimo afengo izájide.

²⁹Juaado jáidino, fidíillano, ie abi uájidiaioi, ráillena.

Jesús cinco mil dígade íññiai ecade
(Mt 14.13-21; Lc 9.10-17; Jn 6.1-14)

³⁰Afe mei Jesús naui oni jino orécamaci meine Jesumo gairíllano, nana íaioi finócafue afémiemo llotíaioi. Afe íaioi llogafue llotíaioi. ³¹Iemona Jesús íaioina daide:

—Mai bi, oni báinino cai ocózinailli, —daide.

Aillo comini dúcioidiaioi, jáioidiaioi; ie jira Jesús ie imaci diga, güinidiaioi. ³²Ie mei Jesús ie imaci diga nocaedo oni eneno tíi daidínomo jáidiaioi. ³³Mei íadi aillo nairai íaioi jáillana ciode. Jesuna onóillano nana jófueмона batínomo aizícana jáidiaioi. Uafue, Jesús ie imaci diga uícomo dúcidiaioi. ³⁴Jesús dúcia mei nocaémona jino jaillano aillo comínina ciode. Cióillano afémacimo dúcecaide. Íaioina izíruite níbai úíñoraimanide ovéjaíai izói itíaioi. Ie jira diga ráfuiaina íaioimo llote. ³⁵Ja nauídemo ie llófuegamaci afémiena daiízaibitiaioi:

—Ja nauízaide. Afe benomo comini jofona íñede. ³⁶Mai comini oni ore áinori itícuaímo jíáie jofue diga, dinomo íaioi güille íbajillena. Mei íaioi güillena benomo íñédeza, —daidiaioi.

³⁷Jira Jesús uai ote:

—Mai omoi íaioi eca, —daide.

Afémiena daidiaioi:

—¿Cai meita jaillano íbáredicai, doscientos dígabe fidi pan bimaci ecállena? —daidiaioi.

³⁸Jira Jesús daide:

—¿Niga pan ómoimo ite? Eroizai, —daide.

Afe fidíillano daidíaiói:

—Jubécuiro diga panes ite, mena chamu diga, —daidíaiói.

³⁹ Ie jira mócorede raitíremo Jesús comini énenorie dázierie raizítate.

⁴⁰ Iemona cincuenta íemo jái cien dígamierie raizídaitiaíói. ⁴¹ Iemona Jesús afe jubeba panes mena chamu diga llíinote. Llínuano caifo monamo érocaillano:

—Iere figura, —daide. Daíí dainano afe pan ditade. Dítajano ie llófuegamacimo fecade. Llófuegamaci ja comínimo oni fecádíaiói. Daje izói mena chamu nana comínido fecádíaiói. ⁴² Nana comini güitíaiói. Ua ñue jeíredíaiói. ⁴³ Güilla mei panes chamu diga fiébidinona doce dígakai cirígai orúttatiaíói. ⁴⁴ Afe Jesús fecaca panes güitímaci cinco mil dígamiíai.

Jesús jainoi emódodo macade

(Mt 14.22-27; Jn 6.16-21)

⁴⁵ Raíre méifodo Jesús ie llófuegamaci nocaedo jorai ruícafenemo orede. Afe llezica íaíoiña ie uícomo Betsáidamo orede. Dinomo íaíói jailla. Daíí ñeta llezica mei Jesús nana comini diga rainode. ⁴⁶ Íaíói ráinua méifodo Jesús idu emódomo Juzíñamuimo úrizaide. ⁴⁷ Ja naiomo nocáe jorai cígímo ite. Jesús dama éniemo fiébicaide. ⁴⁸ Jesús íaíói taino jáiana ciode. Taino jaitíaiói, mei jairifo meine íaíói fúuoideza. Iemo ja monáizaidemo Jesús íaíoi mo ánozide. Jainoi emódodo macade. Ainozide, íadi jicado fíiaide izói macade. ⁴⁹ Ie jainoi emódodo mácajana íaíói cióillano comeci jacíruioicana facádíaiói: “iÑibai janaba!” daidíaiói. Jira caillfoidíaiói. ⁵⁰ Nana áfena cióillano iere jacínaitiaíói. Mei íadi Jesús raíre íaíoi mo úrite; daide:

—iAbi omoi mame! ¡Cueza! ¡Jacíruiñeno omoi iri! —daide.

⁵¹ Íaíoi mo itícaemo jofo jaide. Jofo jáidemo jairifo llíicaide. Iemo jacíruioicana áferi iere fáigacaidíaiói. ⁵² Ua afe daíí fáigacaidíaiói, mei afe duera pan fia uáimona jamánomo aillo comúttatena comécido onóñediaíoi; íaíói comeci nai ríirena jira.

Genesaret éniemo ite iráredino Jesús jíllotate

(Mt 14.34-36)

⁵³ Jorai ruicáfellemo jáitanona Genesaret éniemo dúcidíaiói. Zíjñillano nocáe ari cuinádíaiói. ⁵⁴ Nocáemona jino jailla llezica, afénomo ite comini raíre Jesuna onódíaiói. ⁵⁵ Iemona afémaci nana afe éniemo raíre aizícana llujídiíaiói. Iemona Jesús illánona fidíillano, afe dínomo iráredímaci duera inírabanido atídíaiói. ⁵⁶ Nágagobiaído ie jáiacana izói afe jofue cígímo ite ocózinairanomo iráredino jónefíredíaiói. Aillue jofue díne ie jáiadi, dúera jofue díne ie jáiadi, fia jofo inéñallegoído ie

jáiadí, daje izói iráredino iomo jóonetiaioi. Afe llezica Jesús inícuiro fueda íaioi jetánollena daa bie dáarie izire íemo jicádiaioi. Nana áfena jetánotino jíllobicaidiaioi.

¿Minica caina iaire finode?

(Mt 15.1-20)

7 ¹Iemo fariséuai Jesumo ánozidiaioi, dáarie ocuífafue llófueraini díga. Afe llófueraini Jerusalémona bitíaioi. ²Nana bimaci Jesús llófuegamacimona dámierie ciódiaioi. Afe llófuegamaci onoi jocóñeno güitíaioi, fariséuai afémacina daí daide, mei bimaci onoi jócua ocuica níciduafuemo dúcitaiñediaioiza. Afe ícoinia íaioi jánana úritiaioi. ³Daí daidíaioi mei fariséuai nana judíuai díga íaioi jaiáigima uai nai úcaciaioiza. Aféfuiai daide, comini nai bie izói íaioi onoi díga icaño jócoñenia güínidiaioi. ⁴Daje izói güille fecáracomona meine billano, onoi jócua ocuica níciduafue nai fuitáñenia güínidiaioi. Nai aillo ite afémaci jíaie úcaigafuiai. Uafue, íaioi jiróracuai díga icaño jocófrediaioi. Daje izói íaioi ícruai, cadéruai, jamánomo díga ícaño jocódiaioi íaioi ínfrabanillai díga. ⁵Iemona fariséuai, ocuífafue llófueraini díga Jesumo jicánotiaioi:

—¿Nibái mei o llófuegamaci cai jaiáigima daináfuiái úcaíñediaioi? Daí onoi íáirededo güitíaioi, —daidíaioi.

⁶Jesús uai ote:

—Juzíñamui uai lloraima Isaías ñue llote. Nana omoi abina ñúemaci, íadi comécina íáirediomoi. Ie cuia llezica ómoimo llote:

Bie comini fuedo ñúefue cuemo jítadiaioi.

Mei íadi íaioi comeci cuemo jaináíñede.

⁷Cue ñúefuedo úrillena cuemo gairífrediaioi, mei íadi íaioi úrillafue ráííñede.

Iaioi llófuega Juzíñamui daináuai, fia jamai comini ocuífafuiai.

Juzíñamui uáiñede, daí íaioi daina íadi, daide.

⁸Mei Juzíñamui ocuífafue féitatiomoi, fia comini daináfuiái jeire omoi óllena. Aféfuiai daide: ícruai jocóllena, jiróracuai jocóllena, aillo jíaie afe izóidífuiái omoi finóllena.

⁹Iemo afe emódomo bie izói zanoda íaioina daide:

—Juzíñamui ocuífauai iere ebire oni eneno omoi fáicanocaiga, dani omoi daináfuiái uícaillena. ¹⁰Mei Moisés daide: “Ñue jacíruioicana o moo canori, o ei díga. Ie ei ie moo díga fiénina úritimie uáfuenta titáredeza,” daide. ¹¹Mei íadi jíáifodo daidíomoi:

—Dámie ie moo íaillinona bie daírede, “Ona canónidícue, mei nana cuemo ite ráaie jae ‘Corbán’ itíaioiza”. (Afe uai dobáicana daina Juzíñamui íena mamécaza.) ¹²Dámie daí daíadi, ja mei ie ei ie moo díga canónide náfuetiomoi. ¹³Afe ícoinia Juzíñamui ocuica uaina

jámairuitiomoi. Uafue, comini llocana jaide llogafue ínota ñúefuena jámairuitiomoi. Aillo afe izóidifuiái finófirediomoi.

¹⁴Nane dáanomo Jesús comini jíirite; jíirillano íaioina daide:

—Nana omoi cácarei, comeci onoiri. ¹⁵Nana güíllemo comécina íáirenafue íñede. Mei íadi comécimona jino bitifue come comeci íáiretate.

¹⁶Omoimona cacáreiacadino cacai, —daide.

¹⁷Jesús comini fíiano jofomo jaide. Dinomo ie llófuegamaci afe onóigafuedo íemo jícanótiaioi. ^{18,19}Iemo íaioina daide:

—¿Daíí jaca ónoñetiomoi? Nana jinona güiga raa comécimo jáíñede. Jébegimo jaide. Ie jira cómena íáiruitañede. Jébegimo jailla mei, abímona oni dotácaza. ¿Aféfuena fidíñediomoi?

Afedo Jesús daííacade nana güille ñuera. ²⁰Nane daide:

—Íima comécimona jino bitifue dama afémiena íáiruitade. ²¹Mei afémie erómona, ua ie comécimona jino fieni uibíllafue bite; íemo jiruírenafue bite, naa jáíie jiruífuiái diga; íemo jáíima méniáfue bite, ²²merírrillafue diga; íemo jáíima raa bairócanafue bite, jáíie fiénidifuiái diga; ie mei jáíima jífuiáfue bite, nana íáiredifuiái diga. Iemo úradoillafue bite, naa táinona úrillafue diga. Iemo táinona abí ínuáfue bite, naa abina onóñenafue diga. ²³Nana bie figóñedifuiái come erómona bite; billano cómena íaire finode.

Jíáizie ingo Jesumo ínote

(Mt 15.21-28)

²⁴Dinómona Jesús Tiro éniemo jaide, Sidón énie diga. Daa jofomo jaide. Buna ónoñeilla báinino jaide. Mei íadi afémie retáiriride. ²⁵Iemo fiénidena jóriairedingo ei, ie íllana raire fidide. Billano Jesús anamo dújude.

²⁶Afengo judío ingóñede; jíáizie ingo. Afengo énie mámecei Sirofenicia. Afengo jízamo ite fiénide jóriai óllena Jesumo jícade. ²⁷Mei íadi Jesús daide:

—Juzíñamui úruiai raire nano fueñe güílleza. Juzíñamui úruiai güille bairoda tóica jico izoide comínimo ígadenia figóñede.

²⁸Afengo uai ote:

—Uafue Ocuíraíma; mei íadi úruiai güíllamona, ana cocídijiai, güírábani anamo ite jícótiruai güífirediaioi, —daide.

²⁹Ie mei Jesús daide:

—Ua llotio. Iemona ja jáiredio, o jízamo ite fiénide jóriai jae oni jáideza, —daide.

³⁰Afengo jofomo dúcina llezica, iníramo bíide jízana ciode. Fiénide jóriai ja ua aféngomona ñue oni jaide.

Jefona cacáñede gogódime Jesús jíllotate

³¹Nano íanori íllano Jesús ja Tiro éniemona billano, Sidón énie dibénedo jaide. Afe mei Decápolis éniemo ite jófuiái dinedo jaide. Aféniedo jaillano,

meine abido Galilea jóraimo dúcida. ³² Afénomo jefona cacáñede uaina jino figo baiñnedimie Jesumo atídiaoí. Iemo izire jicádiaoí Jesús afémiemo onoi bitállena. ³³ Ie jira Jesús náiraimona oni báinino íena uite. Dinomo Jesús dama ie onocai jefona cacáñnedimie jefomo dutade. Ie mei Jesús dama ie onócaimo tuánuano afe úriñnedimie íife jetánote. ³⁴ Afe mei Jesús monamo érocaillanona comeci zúurenaimona zegóricaide. Zegóricailano íena daide:

—íEfata! —daide. Afe uai jino dobáiñuano daina: túijicai.

³⁵ Afe llezica jefona cacáñnedimie jefo túijicaide; ie íife ñue jíllode. Iemona afémie ja ñue úrite. ³⁶ Iemona Jesús íaioina rairuide:

—Jiáimacimo lloñeno iri, —daide. Jesús afe daí dígcacaiño íaioina rairuide. Mei íadi Jesús iere rairuide íadi, áfena náfueñeno aféfuena baimo jino llócaidiaoí. ³⁷ Iemo nana comini iere jamánomo fáigacaidiaoí. Daidíaoí:

—Nana ñue finode. Afémie jefona cacáñnedimie cacáitate; uaina jino figo baiñnedimiena ñue úritade, —daidíaoí.

Jesús cuatro mil diga comini ecade

(Mt 15.32-39)

8 ¹ Aféruillaído aillo comini meine dáanomo gairídiaoí. Íaioí güille íñede. Ie jira Jesús ie llófuegamaci jírrita, íaioina daide:

² —Bie náirairi dúcaidicue. Ja daruíamani benó cue diga itíaoí. Íaioí güille jae íñede. ³ Güiñeno íaioí jofomo orédicuenia, iodo báicana jáitiaoí. Dáarie jicana bitíaoiza, —daide Jesús.

⁴ Ie llófuegamaci uai otíaoí:

—Benó bu íñénañoza íminícana íaioí ecáredicai?

⁵ Jesús íaioimo jicánote:

—Íñiga panes ómoimo ite? —daide.

Jira afémaci daidíaoí:

—Siete panes caimo ite, —daidíaoí.

⁶ Ie jira nana comini ana éniemo ráítate. Iemo Jesús afe siete panes llínuano, Juzíñamuina “Figora” daide. Daina mei, afe panes dídade. Daíí ñeta, ie llófuegamacimo ite. Afe mei llófuegamaci comínido oni fecádiaoí. ⁷ Afémacimo due jiza chamu ite. Jesús Juzíñamuina “Figora” dainano afe chamu fecátate. ⁸ Nana güitíaoí. Iemona ñue jeírediaioí. Ie mei güillamona fiébidino siete diga cirigai iráidiaoí. ⁹ Afe güitino cuatro milmo ánoziacade. Afe mei Jesús nana íaioí rainode. ¹⁰ Ráinua mei afémie raire ie llófuegamaci diga nocaemo jofo jaide. Iemo Dalmanuta éniemo jaide.

Fariséuai uai dánamona comuide onótate raa jicádiaoí

(Mt 16.1-4; Lc 12.54-56)

¹¹ Iemona fariséuai Jesumo júfduaíbitiaioí. Ie facátaiacadiaoí. Iemona: “Monámona uaido comuide onótate raa caimo ácatari,” daidíaoí. ¹² Iemo Jesús comeci zúurenaimona izire zegóricailano daide:

—¿Nibái mei bie nairai uáimona comuide onótate raa jicádiaioi? Uáfuenta ómoimo lloticue, jaca onótate raana bu ómoimo fínoñeite, —daide.

¹³Jira Jesús íaioi fíano meine nocaemo jaide. Iemo jorai enéfenemo jaide.

Fariséuaimo ite pan aillo fáitate raa izóidifuedo Jesús llote
(Mt 16.5-12)

¹⁴Jesús ie llófuegamaci dîga íaioi jailla llezica, íaioi ráiñuai féitatiaioi. Dinó nocaemo fia daa pan íaioimo ite. ¹⁵Iemo Jesús íaioi ocuide:

—Omoi cacai. Fariséuaimo ite pan aillo fáitate raa izóidifuemona abí omoi rairuri. Daje izói Heródesmo ite pan fáitate raa izóidifuemona abi omoi rairuri, —daide.

¹⁶Iemo llófuegamaci dani conímamo llotíaioi:

—Nibai cai pan iñena jírari, Jesús caina daí riire daide, —daidíaioi.

¹⁷Jesús dani íaioi úrillana onóillano daide:

—¿Nibái mei, “caimo pan iñede” dani jofu conímamo daífirediomoi? ¿Nai fidñediomoi? ¿Nai omoi comécimo déiñede? ¿Omoi comeci nai iere riírede? ¹⁸¿Omoi uído cióñediomoi? ¿Omoi jefodo cacañediomoi? ¿Nai cue finócafuenta onóñediomoi? ¹⁹Nai cinco mil íñiai dîgamiedemo afe cinco panes cue fecácamo, ¿niga cirigai fiébidinona iráidiomoi? —daide.

Iemo daidíaioi:

—Doce dîgagai cirigai, —daidíaioi.

²⁰Jesús nane daide:

—Daje izói cuatro mil íñiai dîgamiedemo afe siete panes cue fecácamo, ¿niga oruide cirigai iráidiomoi? —daide.

Iemo daidíaioi:

—Siete dîgagai cirigai, —daidíaioi.

²¹Iemo íaioina daide:

—¿Nai omoi comécimo jaca déiñede? —daide.

Betsaida jófuego ite uina cióñedimie Jesús jíllotate

²²Ja Betsaida jófuego dúcidiaioi. Iemo uina cióñedimie Jesumo comini atídiaioi. Iena jetánollena izire jicádiaioi. ²³Uina cióñedimie ónoido llínota, jofue jinomo Jesús ie uite. Iemo fue fáicido ie uimo bitade. Afe llezica afémiemo onoi bitade. Afe mei íemo jicánote:

—¿Ja baca o ui cioide? —daide.

²⁴Jira uina cióñedimie érocaillano daide:

—Jii, comini mácana ciódicue, mei íadi uáfodo íaioina cióñedicue. Afémaci aménaiai izói cióidiaioi, —daide.

²⁵Ie jira Jesús nane dánomo ie uimo ie onoi jóonete. Afe mei afémie riire eroide. Iemo ie ui ja jíllode; ja afémie naga raana uáfodo ñue ciode.

²⁶Ie mei Jesús ie jofomo ie orede. Iena daide:

—Jófuemo jáiñeno iri. Afénomo ite comínimo, buna lloñeno iri,
—daide.

Pedro Jesús Crístona maméinafue jino ñue llote
(Mt 16.13-20; Lc 9.18-21)

²⁷Afe mei Jesús ie llófuegamaci diga, Cesarea Filipo éniemo jaide. Afénomo ite jéenide jófuiái dinedo jáidiaioi. Afe iodo íaioi jáillanomo, Jesús ie llófuegamacimo jicánote:

—Comini cuena ¿nie izói daidíaioi? —daide.

²⁸Afémaci uai otíaioi:

—Dáamierie Juan Bautístadio daide. Jiáimiai Elíasdio daidíaioi. Ie jiáimiai jiáie uai lloráimadio daidíaioi, —daíí uai otíaioi.

²⁹Iemo íaioina jicánote:

—Omoimona, ¿cuena bu daidíomoi? —daide.

Ie jira Pedro íena daide:

—O Crístodio, —daide.

³⁰Iemo Jesús íaioina ocuide, aféfuena bumo llóñeilla.

Jesús ie tñillifue fidtate
(Mt 16.21-28; Lc 9.22-27)

³¹Iemo Jesús dama ie duere finóllifue como fueñe íaioimo llote. Lluano daide:

—Nanoide hima Jitódicueza íadi iere duere zefuítallicue. Eicomini cuena ruiffruitiaioi. Daje izói lletáriraini illaini, ocufcafue llófueraini diga cuena ruiffruitiaioi. Omoina daidicue, afémaci cuena méineitiaioi. Mei íadi daruíamani íllamona tñillanomona meine abido caifo náidacaiticue. ³²Afue íaioimo ñue jino llote. Ie jira Pedro eneno oni Jesuna uite. Uillano Pedro Jesús íena lletade. ³³Mei íadi Jesús meine gírecaillano ie llófuegamacimo eroide. Jesús Pedro llétano daide:

—iMai cúemona oni jai! Satanás izóidimiedioza. O comeci Juzíñamui mamécana ónoñede. Dama bie éniemo dúidino úrilla izói úrtio, —daide.

³⁴Dáanomomo nane Jesús ie llófuegamaci jíríte, nana jiáie comini diga. Íaioina daide:

—Cuedo jáiacadimie mai dama ie comeci jítaina féitari. Féitano cuedo biri. Daíí cuedo bíllamona nibai afémie tñiadi áfemo comeci fáinide; cuedo bírede. ³⁵Jaca ninomo íllena, dama ie abi rairuíacadimie dinó jaca raire llícaite. Mei íadi cue ícoinia abi rairuíacañedimie meine jíllano llícañeite; daje izói, cue lloga ñúefue ícoinia abi rairuíacañedimie zíñona íite. ³⁶Mei jíáífodo nana éniemo ite raa cai óiadi, mei íadi afe llezica cai zíñona illifue niné féiadi, ¿nieze canócacai? ¡Canóñegacai!
³⁷¿Nieze íbarede da come ie zíñona illafue abido óllena? Íbánide. ³⁸Mei jii, dáamie cuena meáiruadi, abido afémiena meáruiticue. Daje izói bie

minícana ínoñede fiénidimaci uécomo cue lloga uaina meáruitimie, íena meáruiticue. Mei Nanoide Hima Jitódicueza. Uire cue Moo aillo ñue máiriedo bíiticue. Nana ie ñuera abí imaci diga bíiticue. Aféruimo bie éniemo ite cuena meáruitinona, daje izói íaioina meáruiticue.

9 ¹Nane Jesús íaioina daide:

—Uáfueña ómoimo lloticue. Benomo itímacimona dáarie nai íaioi tíñenia Juzíñamui aillo ie ríinodo ie illáimana íllana cóitíaoi, —daide.

Jesús abí jíáifodo méidoficaide

(Mt 17.1-13; Lc 9.28-36)

²Seis dígarui íllamona, Jesús Pedro, Santiago, Juan diga uite. Dani dígamie eneno caifónedumo afémie uite. Ja dinomo íaioi eróicana afémie abí jíáifodo méidoficaide. ³Ie ínícuro quénicuirona jaide, ua iere úzere de jaiillici izói. Bie éniemo finódino íníoina afe izói úzeretanidiaioi. ⁴Afe llezica Elías, Moisés diga Jesumo úrillana ciódiaioi. ⁵Jira Pedro Jesuna daide:

—Llófueraima, nii cai benomo ñue illa. Daámani jofóchupi ómoiena cai finolli, daa óchupi, jíáie Moisés ichupi, jíáie Elías ichupi, —daide.

⁶Afe dáanomo ie llófuegamaci iere jacínaificaidiaioi; jacínaillano Pedro nie izói dáinana onóñenano daí daide. ⁷Afe llezica íaioimo mona uíllie ana bite. Billano afémacina ferínote. Afe mona uílliemona daa uaina cacádiaioi. Llote:

—Bie cue izíruiga Jitó. Afémiemo cácarei, —daide.

⁸Afe llezica, nágafene eróroidiaioi íadi íaioi diga buna cióñena, dama Jesús.

⁹Idumona ana bitíaoimo Jesús afe íaioimo ciónafue jíáimacimo llúana rairuide. Íaioina daide:

—Nanoide Hima Jitódicue. Uire cue tíillinomona meine abido cáadimiéna cue illíruimo afe omoi ciónafuena llóreitíomoi, —daide. ¹⁰Ie jira aféfuemo dani coméciidiaioi. Mei íadi afémie tíillinomona abido cáadimiéna illífuena jícánofirediaioi:

—¿Minícana íite? —conímana dani daidíaioi.

¹¹Ie mei Jesumo jícánotiaioi:

—¿Níbái mei ocuífafue llófueraíni daíífrediaioi, caína illáimaite Mesías dainámie uícodo Elías raire biite? —jícánotiaioi.

¹²Afémie uai ote:

—Iere uafue Elías raire cue uícodo bite. Ua billano nana meine ñue jaícina fínuai bite. Iemo, mei Nanoide Hima Jitódicueza, cue billáfuedo ¿nie izói Juzíñamui Cuegáuai daide? Aféuai bie izói daide: “duere zéfuiticue” daide. Daje izói “comíni cuena jámairuitiaioi” daide. ¹³Mei íadi ómoína daidicue, Elías ja bite. Dani afémaci óiacana izói afémiemo finódiaioi. Mei Cuegáuai uícomo daína izói, afe izói ja afémiemo zuíde, —daide.

Jesús fiénidena jóriairede dúemie jíllotate

(Mt 17.14-21; Lc 9.37-43)

¹⁴Ie mei ja jíáie llófuegamaci illánomo Jesús daámani caifónedumo uigámaci díga meine bitiaioi. Billano aillo comini íaioimo gairíllana ciódiaioi. Ocuica uai llófueraíni daánomo ite. Afe llezica afémaci Jesús llófuegamacimo júfidotiaioi. ¹⁵Ie mei Jesuna cióillano iere fáigacaidiaioi. Afémiemo aizícana uáiduaidiaioi. ¹⁶Ie jira Jesús ie llófuegamacimo jicánote:

—¿Minica afe ocuica uai llófueraíni júfidotiomi? —daide.

¹⁷Afénomo itímacimona daa uai ote:

—Llófueraíma, benó omo cue jító atídícue. Fiénide jóriaí afémie uáinino finode. ¹⁸Náganomo ie jáiadi afe jóriaí ie uánona ana dotáfírede. Ja dínomo fueo mulléfirede; afe llezica ízie mutúricaide. Iemona ie abi iere naillíbicaide. O llófuegamacimo fiénide jóriaí jino óllena jicádícue, íadi afémaci ónidiaioi, —daide.

¹⁹Jira Jesús uai ote:

—¡Aiii, Juzíñamuimo íinoñedimaci! ¿Nie dinó ómoiri íítícue? ¿Nie dinó ómoína mozíoitícue? Bené dúemie atí, —daide.

²⁰Jira atádiaioi. Afe jóriaí Jesuna cióillano, afe dúemie abi meine cuidítate. Cúidíamona afémie éniemo baíide. Dínomo jabíocaide. Fueo mulléoi. ²¹Jira Jesús ie moomo jicánote:

—¿Ja nié díno daí ite? —daide.

Jira moo daide:

—Jaca ie dúenamona. ²²Díga ícaíño fiénide jóriaí afémie iraimo dotáfírede. Daje izói illemo dotade ie titállena. Minícana cairi o finórenia, mai cairi fino. Cairi dúecairi. Cai cano, —daide.

²³Jesús íena daide:

—¿Nibái mei “O finóreniadi cai cano” cuena daídi? Daí daíñeno iri, mei Juzíñamuimo ínotímiemo naga raa finóredeza, —daide.

²⁴Ie jira afe úrue moo caillfoicaide:

—¡Ínotícue! Cue cano jamánomo cue ínolleza, —daide.

²⁵Jesús aillo comini ofíllana cióillano, fiénide jóriaí riire lletade.

Daide:

—Uáinitade jóriaí, cacáitañede jóriaí, o jino jáíllena ja ocuídícueza, íjai! ¡Bie úrue fáínocai! Meine abído íena oñeno iri, —daide. ²⁶Iemona jóriaí caillide; cáíllano dúemie meine nane riire cuidítate. Cuidítajano oni jaide, íadi afe dúemiéna tíide izói finode. Jira aillo comini:

—Ja tíide, —daídiaioi. ²⁷Mei íadi Jesús ónoído llínota caífo dúemiéna naidánete. Iemona afémie ñue jílloda náidacaide.

²⁸Ie mei Jesús daa jofomo jofo jaide. Afe mei ie llófuegamaci eneno íemo jicánotiaioi:

—¿Nibái mei fiénide jóriaina ónidicaí? —daidíai.

²⁹Jira Jesús daide:

—Bie izói jóriai dama Juzíñamuimo úrillado, íemo ífmairillado jino orérede, —daide.

Jesús ie tíillifue meine fidítate

(Mt 17.22-23; Lc 9.43-45)

³⁰Afénomona íaiói jaillano Galilea éniado jáidiaí. Jesús báinino jáiacade bu óñoëllena. ³¹Mei aféruillado Jesús ie llófuegamacimo llófullofuedeza. Afémiemo zúillifue íaióimo llote. Luano íaióina daide:

—Nanoide hima Jitódicueza íadi uire náiraímo izájillicueza, cue íaiói fállena. Mei íadi daruíamáni cue tíillanomona meine abido cáadimiena íitícue, —daide. ³²Mei íadi afémaci ie dáinana onóñediaí. Daje izói íemo jicánuana jacíruítiaí.

¿Bu iere jamánomo áillomiena?

(Mt 18.1-5; Lc 9.46-48)

³³Iemo afémaci Capernaumo dúcidiaí. Jofomo íaiói illa llezica, Jesús íaióimo jicánote:

—¿Mínícafue iomo júfidotiómoi? —daide.

³⁴Mei íadi jaca uaina onédiaí. Mei jae iodo júfidotiaí, ¿bu cáimona jamánomo áillomiena illa? ³⁵Ie jira Jesús ana ráinaillano, ie doce díga llófuegamaci jíríte; daide:

—Dámie raíre uíécodo áillomiena jáiacaniadi, nano fueñe iere jamáimiena írede; daje izói nana comini canóraimana írede, —daide.

³⁶Iemona Jesús daa úrue llínuano íaiói cígimo jónete. Ie mei ie ónoído íena llirínuano comínina daide:

³⁷—Bie úrue cue mámecido llínotímie dájena cuena llínote. Daje izói cuena llínotímie dama cue llínoñede, mei íadi cue orédimiena cue abido llínote, —daide.

Caina éoñedimie cai dibénemo ite

(Mt 10.42; Lc 9.49-50)

³⁸Iemo Juan Jesuna daide:

—Llófueraíma, dámie cíódicaí o mámecido fiénide jóriai jino orede. Mei íadi caído jáíñena jira íena rairuídicaí.

³⁹Mei Jesús daide:

—Rairuíñeno iri. Mei daí cue mámecido cíórainina raa finódímie ñúemie. Daí finódímie afe ífnua méifomo raíre cuedo fiéni úrinide.

⁴⁰Mei caina éoñedimie ua cai dibéfodo itímie. ⁴¹Jiáie come cue mámecido omoi jirótaadi, mei Crístomo omoi jainaina jira, afe jirótatímie uáfuenta ie jiríddolle raa llínoite, —daide.

Fiénidifuemo baiíllena iere jacírede

(Mt 18.6-9; Lc 17.1-2)

⁴² Jiáie come, bie cuena ínote dúemie fiénidifuemo baiítaiadi, afe come fiénide. Baiítatimiemona figura, cimoimo áillue nofícina cúinano monáillaimo dotárede. ⁴³ Dama o onoi fiénidifuemo o baiítaiadi, afe o jaitari. Júbezi onoi díga ziiño ñue illafue Juzíñamuiemona o maiñoadi, iere ñuera. Mei nágafezi onoi íadi “comini duere finolle iraimo” o dotábicaiaadi, iere figóñede. Afénomo ite irai dúitanide. ⁴⁴ Afénomo ite aigíroiaí tñiñediaioi; afe aigiroi, afeno itímacina ziiñona duere fñoitiaioi. Afe irai jaca dúiñede. ⁴⁵ Daje izói o idai fiénidifuemo o baiítaiadi, áfena jaita. Júbene ídaiñide o illa llezica ziiño ñue illafue Juzíñamuiemona o maiñoadi, jamánomo ñuera. Mei jiáifodo iraimo o dotábicaiaadi ñue mena ídairédimie o íadi, iere figóñede. Afénomo ite irai dúitanide. ⁴⁶ Afénomo ite aigíroiaí tñiñediaioi; afe aigiroi, afeno itímacina ziiñona duere fñoitiaioi. Afe irai jaca dúiñeiteza. ⁴⁷ Daje izói o uiji ona íáidaitaiadi, mai afeji cuerónori. Ua júbene fíidimie Juzíñamui illáimana illánomo o jáiadi, jamánomo ñuera. Mei íadi nágaillinoi ufjiredimie o illa llezica, iraimo o dotábicaiaadi iere figóñede. ⁴⁸ Afénomo ite aigíroiaí tñiñeitiaioi; afe aigiroi afeno itímacina ziiñona duere fñoitiaioi. Afe irai jaca dúiñede.

⁴⁹ Mei nana fia fecaca Juzíñamui ióbitalle jobaica rílleniammo salna jónefirediaioi, afe fecaca rille ñue íllena. Daje izói nana raamo cai jírinafuiuido ñue íredicai. Aféfuiaí irai come uzilla izírena izói caina izi cácataite, Juzíñamui anamo ñue cai íllena. ⁵⁰ Sal ñuera; mei íadi afe sal ie cáimana féiadi, ¿minícado afe sal meine abido cáimacaitarede? Mai dani conímaiaina caimátaillafue dibénemo omoi iri. Afe llezica comeci caimare uái illáfue dani conímaiaina ífireiri.

Jesús, naga come ie aina oni dótana rairuide

(Mt 19.1-12; Lc 16.18)

10 ¹ Jesús ja Capernaúmoma oni Judea éniemo jaide. Ua Jordán ruicáfellemo ite éniemo jaide. Iemo aillo comini ie illano dinó meine abido gairízaibitiaioi. Iemona Jesús ie ífirena izói íaioina llófuete. ² Iemo fariséuaimona dáarie Jesuna fiene facátaibitiaioi. Jesumo jicánotiaioi:

—¿Mei níbaí dáamie ie aina oni dótajana rairuírede, níbaí ráiruiñega? —daidíaioi.

³ Iemona Jesús uai ote:

—¿Niie izói Moisés ómoína ocuide? —daide.

⁴ Jira íena daidíaioi:

—Moisés llote, dáamie ie aina oni dotácanamona, afémie dinena aféngona “jae ai oni dotaina rabe” cúerede. Ie mei daí oni dotárede, —daidíaioi.

⁵Iemo Jesús íaioina daide:

—Moisés afe uaina ómoimo lloste, mei omoi comeci ifue iere riíredeza.

⁶Mei íadi nano fueñe, Juzíñamui nana ráaniaina comúitaja llezica, “afémie iima ringo ñiga íaillinoína comúitate.” ⁷“Ie jira naga iima, ie ai úamona, ie moo ei ñiga fiénocaillano, oni dáanomo íitiaillinoi. ⁸Daií ie ai onónamona afe íaillinoi daa come izóidena jáitiaillinoi.” Ja mena cómeñediaillinoi, dama daa cómedeza. ⁹Ie jira Juzíñamui dáanomo jóonegaiaillinoi, comini oni dotánide, —dinori Jesús daide.

¹⁰Ja jofomo Jesús naa ie llófuegamaciri dúcinamo, ie llófuegamaci aféfuena Jesumo meine abido jicánotiaioi. ¹¹Jesús íaioina daide:

—Afe ai oni dotádimie jíáie ai óllena, dotaca ringo dibénemo afémie jiruifue finode. ¹²Daje izói ini oni dotádingo jíáimie mo iníreillena, afe jiruifue finode.

Jesús úruiai ñue íllena finode

(Mt 19.13-15; Lc 18.15-17)

¹³Ie mei Jesumo úruiai atídiaoí, íaioimo ie onoi bitállena. Mei íadi llófuegamaci atfdinona rairuide, íaioi átiñeillena. ¹⁴Jesús áfena cióillano ríicaide; jira íaioina daide:

—Rairufñeno iri. Fáinocai úruiai cuemo bílleza. Íaioina llótaidoñeno iri. Juzíñamuimo jaináidino ua afe bie úruiai izói itíaioiza. ¹⁵Uáfueña ómoína daidícue, Juzíñamui illáimana íllana jíruiredicaí. Uruiai áfena jíruilla izói jíruiredicaí. Mei íadi nana afe izói jíruieñedinona Juzíñamui ie caimare illínomo jofo óreñeite.

¹⁶Iemo úruiaína llirínuano, ie onoi íaioimo bítano íaioina ñue finode.

Ráarede jítócome Jesús ñiga úrizaibite

(Mt 19.16-30; Lc 18.18-30)

¹⁷Jesús meine abido jáizaidemo, dáamie aizícana Jesús anamo dújuzaibite. Dújuillano jicánote:

—Ñue Llófueraima, ¿nie izói íitícue zíñona cue illino cue óllena? —daide.

¹⁸Jira Jesús daide:

—¿Ñibái mei cuena fígomie daidío? Ímamona buna fígomiéna íñede.

Dama Juzíñamui fígomie. ¹⁹Ocuícafuiaina onódio:

“Jíáima ai ñiga íñeno iri;

come fañeno iri;

meríriñeno iri;

bumo taino lloñeno iri;

jíáima jífueñeno iri;

o moo, o ei ñiga ñue cacáreiri,” —Jesús daide.

²⁰Afémie uai ote:

—Llófueraima, nana aféfuiaína cue jítócomenamona jeire ófiredícue.

21 Jesús afémiemo éroicaillano íena izíruite; daide:

—O dafue nai jeire oñédio. Mai nana omo ite raa fécajiri. Fécajano afe iba dúeredimacimo ine. Iemona jamánomo jirídolle izoide raa monamo omo iite. Daií o finolle mei, cuedo bii. Mei cuedo o bíllamona o tíadi, áfena náfueñoeno benó biri. Coco jai, —daide.

22 Mei íadi áfena cacáillano, afe íima zúucaide. Ua zuure oni jaide, aillo ie ráaniai illa jira. 23 Ie mei Jesús abido comínimo éroicaillano, ie llófuegamacina daide:

—íNii féirena ráaredimie Juzíñamui illáimana illáruimo jofo jáillena! —daide.

24 Jira llófuegamaci aféuairi iere fáigacaidiaioi. Jesús meine nane daide:

—íUruiái, nii féirena úcubena ínotino Juzíñamui illáimana illáruimo jofo jáillena! 25 Camello eedo uífodo jailla jamánomo juánide, mei íadi ráaredimie Juzíñamui illáimana illáruimo jailla iere Juárezde, —daide.

26 Afena cacáillano, jacnáificaidiaioi. Dani confmamo jicánotiaioi:

—¿Mei bu jílluille? —daiíaioi.

27 Jesús íaioimo eróillano daide:

—Afena comínimo finónide; mei íadi Juzíñamuimo finórede.

Juzíñamuimo finónide raana íñede, —daide.

28 Jira Pedro íena daide:

—Ocuíraíma, nana caimo ite raana fiénocaidicai o diga cai jáillena, —daide.

29,30 Jira Jesús uai ote:

—Uáfueña ómoína dáititue, naga come cue ícoína íemo cue lloga jíllonafue ícoína diga, ie jofo, ie ámatiaí, ie mirínguái, ie moo, ie ei, ie jítoítiaí, ie jacáfaiaí dieze afémie fiénocaiadi, uáfueña meine llínoite. Ja bie éniemo cien dígcacaiño afe baimo jofue, ámatiaí, mirínguái, éitiaí, jítoítiaí, jacáfaiaí llínoite. Uafue, dieze llínoite duere zefuállafue diga íadi. Ie mei monamo zíñona illino llínoite.

31 Aillo biruúllaido nánoraimaci uire ódaidimacina jáitiaioi. Daje izóí aillo biruúllaido ódaidimaci uire nánoraimacina jáitiaioi, —daide.

Dáanomo Jesús ie tíillifue llote

(Mt 20.17-19; Lc 18.31-34)

32 Ja Jerusalén iodo jáizaidiaioi. Jesús ie llófuegamaci uícodo jaide. Comeci iere facábicaidiaioi. Jíáie íedo jáidino jacíruioicana afémiedo jáidiaioi. Jira Jesús doce diga llófuegamaci eneno uáidote. Ianori íllamona íemo finóllifueña abido íaioimo llote. 33 Daide:

—Mai omoi cacai. Nanoide Hima Jitódicueza. Jerusalemo jáizaidicai. Mei íadi dínomo lletáriraini illáiniaímo izájillitue. Daje llezica ocuica uai llófuerainimo izájillitue. Iemo afémaci cue titállena ócuitiaioi. Onínemacimo cuena izájitiaioi. 34 Cueri jífánodoítiaioi. Cuena tícoítiaioi. Cue túallaitiaioi. Cue títaítiaioi. Mei íadi daruíamani íllamona tíllanomona meine abido cáadimiena íititue, —daide.

Santiago Juan diga uire úcoinafue Jesumo jicádiaillinoi
(Mt 20.20-28)

³⁵ Afe mei Zebedeo jító íaillinoi Santiago Juan diga, Jesumo jicajidiaillinoi; daidífaillinoi:

—Llófueraima, coco jicalle jitaigafuena cócomo lloiri, —daidífaillinoi.

³⁶ Iemona Jesús íaillinoina daide:

—¿Minica mei ómicoimo cue finóllena jitáidiomicoi? —daide.

³⁷ Iemo íena daidífaillinoi:

—Uire o ebírede illáimana illíruido, cócomona dáamie o nabézimo, jiáimie o jarífezimo cócona o ráinatari, —daidífaillinoi.

³⁸ Iemona Jesús íaillinoina daide:

—Daií jicádiomicoi íadi abina onónediomicoi. Cue duere zéfuillifue izói, ua erírede jirolle júrua izói, ¿zéfuirediomicoi? Daje izói cue izire tífizaillifue izói, ¿tífizairediomicoi? —daide.

³⁹ Iemo uai ofaillinoi:

—Íle mei! Afena ocuédicoco, —daidífaillinoi.

Jira Jesús íaillinoina daide:

—Uáfueña dáitícue, cue duere zefuillifue izói, duere zéfuitiomicoi. Cue izire tífille izói, títíomicoi. ⁴⁰ Mei íadi cue nabéfenemo, cue jarífenemo ómicoi ráinallena, cúemona llónide. Afe ráinallino dama Juzíñamui maméinamacimo dúide, —daide.

⁴¹ Jiáie diez diga llófuegamaci afefue cacáillano, Santiago Juan dígamó icíritiaioi. ⁴² Iemo Jesús íaioina jíirillano, íaioina daide:

—Onódiomoiza, náiraiaimo illáimaifiredino riire ocuédillaini dani jáidiaioi, comínina náamatallena. Aféllaini cígiri ite ríimaci, íaioi rínona izire comínimo cácatatiaioi. ⁴³ Mei íadi omoi cígiri afe daií íñeitiomoi. Mei jiáífodo omoi dibénemo illáimana íacadimie, omoi canófiredimiena jáirede. ⁴⁴ Daje izói ómoimona ocuácadimiena íacadimie, nana jiáimaci anamo íaioi tájítagamiena írede. ⁴⁵ Mei jii, Juzíñamui oreca Nanoide fima Jitódicueza. Mei íadi jiáimaci cuena canóllena biñédicue. Mei jiáífodo nana comínina cánuaibitícue. Uafue áillomaci íaioi fiénidífueмона zuitalle izói, íaioina cue jíllotallena tífizaibitícue, —dínori Jesús llote.

Jesús uínidimie Bartimeo jíllotate
(Mt 20.29-34; Lc 18.35-43)

⁴⁶ Jae Jericomo dúcidiaioi. Afe jófueмона Jesús jino jáidemo ie llófuegamaci diga, naa aillo comíniri, uínidimie io fuemo ráiide. Afémie Timeo jító, Bartimeo. Dño afémie úcube jicáfírede. ⁴⁷ Nazaret ímie Jesús áinozillano fidíillano, uínidimie jíirioicaide:

—¡Jesús, jaiai illaíma David Jító, cuemo dúecai! —daide.

48 Aillo comini éna rairuúdiaioi ie llícaillena; íadi jaca nai jamánomo jíirioide:

—iDavid Jitó, cuemo dúecai! —daide.

49 Ie jira Jesús uái náidaillano daide:

—Afémie uaido, —daide.

Jira únidímie uáiduano éna daidíaioi:

—Abi mame. Náidacai. O uáidoteza, —daidíaioi.

50 Jira ie emódoðiroi duñuano iere raire náidacaillano Jesumo bite.

51 Jira Jesús íemo jicánote:

—¿Mínica omo cue finóllena jitáidíio? —daide.

Jira únidímie uai ote:

—Llófueraima, cue úíreacadícue, cue eróllena, —daide.

52 Jesús éna daide:

—Mai o jairi. O ínuamona jae jíllodioza, —daide.

Afe llezica únidímie ciode. Iemona Jesús jáillado afémie jaide.

Jesús illáimana Jerusalemo jofo jaide

(Mt 21.1-11; Lc 19.28-40; Jn 12.12-19)

11 1 Jerusalemo áinozillamona, Jesús mena llófuega faillinoi uícomo orede. Jae Betfagé jofue, íemo jíái Betania jofue díga áinomo itíaioi. Dáanori Olivo dáina ídumo itíaioi. Iaillinoi óriano daide:

2—Uícomo ite duera jófuemo ómicoi jai. Omicoi dúcille llezica cuinaca duera búrrona cóitíomicoi. Nai áfedo buna ráiiñena. Zúitajano cuemo ati. 3 Bu ómicoímo jicánoiadi ¿nibái ómicoi zuitaca? éna dáíitio: “Ocuíraima Jesús jitailla jira. Ie mei raire meine omo atille,” —daide.

4 Afe íaillinoi jaillano jino naze fue iori cuinaca búrrona baizájidiaillinoi. Afe zuitádiaillinoi. 5 Dáamie dino itínomona íaillinoína daide:

—¿Mínica ñetíomicoi? ¿Níbái burro zuitádiomicoi? —daide.

6 Jira uai otíaillinoi Jesús íaillinoína dáina izói. Ie jira:

—Jii, mai ui, —daidíaioi.

7 Iemona búrrona Jesumo izájidiaillinoi. Izájillano íaioi ínícuirona burro emodo jobédaíoi. Ie mei dínomo Jesús caífo ráínade. 8 Aillo comini íaioi iníroi iomo jobédaíoi. Jíáímaci íbiairede amena rábaillai otá iomo jóonetiaíoi. 9 Uícoídímaci ódaídímaci díga jíirioicaídaíoi:

—iEbírede! ¡Juzíñamui mámecido bitímie caimáreficairi! 10 ¡Como íacade illáimana illino caimare comuiri! ¡Ua cai jaiáigíma comuídímie David illáimana illino ñue móonairi! ¡Juzíñamui ebírede rafue daíri! —daidíaioi.

11 Ja daí Jesús Jerusalemo jofo jaide. Jaillano Juzíñamuimo gairíracomo jaide. Nágafenemo eróirioicaillano jino Betániamo jaide, naa ie doce díga llófuegamaciri, mei ja nauídeza.

Jesús llizíñede higuera daina amena faidode

(Mt 21.18-19)

¹²Afe jiáiruido Betániamona jino abido billano, Jesús jufíruite. ¹³Macádiaioimo ñue íbiairede higuera aménana Jesús jicana ciode. Iemona dinomo jaide afénamona nibai ie llizíllajaiaina óllena. Mei íadi Jesús dúciillano, hígojaiaina baiñede. Afe amena táinona fia íbiairede, mei aféruimo hígonino nai dúciñedeza. ¹⁴Iemo Jesús afe aménana fáiduanu daide:

—Jaca benómona buna bie amena llizíñenamona ie llizíllajaiaina ríeñeiteza, —daide.

Daíí ie dáinana ie llófuegamaci cacádiaioi.

Juzíñamui gairíraco Jesús duano ñue finode

(Mt 21.12-17; Lc 19.45-48; Jn 2.13-22)

¹⁵Ie mei Jerusalemo meine dúcidiaioi. Juzíñamui gairíracomo Jesús jofo jaillánona, dinomo ráaie fecáidino íbároidino diga jino juaide. Ucube méidoraini ibani Jesús caitade, fíicirillai fecáidino ráiiraniai diga. ¹⁶Afe gairíracomo buna minfcana úiñellena afémie rairuide. ¹⁷Íaioi llófuete:

—Juzíñamui Cuegáuai daide: “Cue jofo ua nana náiraímo Juzíñamuimo úrille illácona mameide,” mei íadi merfritino illano jae afénona finódiomoi, —daide.

¹⁸Lletáriraini illaini, ocuícáfue llófueraini diga afe ie finócafueña fidídiaioi. Iemona afémie fállena jenódiaioi. Iena jacíruitiaioi, afémie llófueinafueri nana nairai iere fáigacaideza. ¹⁹Ja nauízaidemo Jesús afe jófueмона jino jaide, naa ie llófuegamaciri.

Nauí ciona higuera amena

jae zaférede duírainá jaide

(Mt 21.20-22)

²⁰Afe jiáiruido, jítiramo meine abido Jerusalemo íaioi billano, nauí ciona higúerana abido ciódiaioi, mei íadi birui afe amena nana ie jáinauairi zaférede duírainá ja jaide. ²¹Iemo Pedro comeci úbicaillano, Jesuna daide:

—iLlófueraíma, eró! O faidoca higúerana ja duírainá zaféreficaide, —daide.

²²Jesús íaioímo uai ote:

—Juzíñamuimo mai omoi ínofireiri. ²³Uáfueña ómoína dáitícue, dáamie jizíñeno nana ie comécido ínuamona, bie caifóneduna ocuícana daííadi, “Benómona oni ii; jóraímo dotábicaíri,” afe ie dáinana ua zúite; afémie jeire ua llezica, afefue daíí afémiemo íficaite. ²⁴Ie jira ómoína

dáititue, Juzíñamuimo omoi úrillano jicaca raa, ja nibai o llínoga, áfena mai o ínofireiri. Iemona afe jicaca raa óitiomoi. ²⁵Nágaruido Juzíñamuimo o úriadi, jiáimiena o éoiadi, mai íemo o comécimo ite íaifue féitari. Daií o finori, monamo ite omoi Moo Juzíñamui ómoimo ite íaifuiái dólleña. ²⁶Iadi o abí ímie iba omoi óiadi, monamo ite omoi Moo Juzíñamui, ómoimo ite íaifuiaina dóñeite.

Jesumo ocuille uai ite
(Mt 21.23-27; Lc 20.1-8)

²⁷Iemo Jerusalemo abido bitáioi. Jesús gairiracomo maca llezica, lletáriraini illaini íemo ánozidiaioi. Afe llezica ocuica uai llófuetino afémiemo gairidiaioi, éicomini diga. ²⁸Nana íemo jicánotiaioi:

—¿Bífuiaí fínuana, bu o ocuilla? ¿Bu rímodo bie raa finódio? —daií daidiaioi.

²⁹Jesús íaioi uai ote:

—Omoimo daa rafue jicánoititue. Cuemo uafue omoi llóyadi, bífuiaí cue finoca ríno ómoimo llóititue. ³⁰¿Bu mei ocuica báutizallena Juan? ¿Juzíñamui nibai ocuica, nibai comini? Mai fáirio, —daide Jesús. ³¹Ie mei afémaci daní júfidotiaioi; daidiaioi:

—Juzíñamui ocuica cai daiíadi, Jesús caina fairíoite: “Iemona ¿nibái mei íemo ínoñediomoi?” ³²Mei íadi comini ocuica, daiínidicai, —daidiaioi.

Comínina jacfruillano daií úritiaioi. Ja onódiaioiza, nana comini Juamo ñue comécidiaioi: “Ua Juzíñamui uaido Juan úrite,” daidiaioi.

³³Iemona Jesuna daidiaioi:

—Onóñedicai, —daidiaioi.

Ie mei Jesús íaioina daide:

—Nie rímodo bie raa finóditue, daje izói ómoimo llóñeiticue, —daide.

Comini fáfirede táijidino jiáifuena caina onótate
(Mt 21.33-46; Lc 20.9-19)

12 ¹Iemona Jesús íaioi onógafuiaido íaioimo úrizaide; íaioina daide:

—Nauí dáamie jíriconai izoide raa rizájide. (Afe jírítue izoide raa ríinano viñédona mameina.) Afémie afe rillano ie abí cirínora finode. Ie mei afe jíricono eroide úvaiaí zaizíraco finode, afe llizilla iji íaioi óllena. Nane are caifo jacafai cigi úiñoraco afémie nite, afe rigano ñue úiñollena.

‘Ie mei afe énie naama dáarie táijitaganomo ie rigano fecade, áfena íaioi úiñollena. Afémie daií fécano oni jica jiáie éniemo jaide. ²Jíriconino llezica, ritímie ie ocuícámie afe táijitagamacimo orede, íeiena mameide llizíllajiaí dieze óllena. ³Mei íadi afe uáibitímiena llaitádiaioi; lláitano íaioi faga. Daií ñeta ria íemo fecáñeno oni íena orédiaioi. ⁴Ie jira afe

naama nane jiáie ocuícamié orede. Mei íadi afe orécamiéna nófiedo níjdiaioi. Níjiano ie ifona íaioi bofeca. Iemo fiéni íena úritiaioi. ⁵Daje izói nane jiáimie orede. Afémie íaioi titaca tíide. Afe mei diga icaiño aillo jiáie ocuícamiéiá dinomo oréoié. Afe orécamacimona dámiéie fia faga; jiáimaci tícoizitiaioi.

⁶Nai dáamie naama dibénemo ite. Daa afe naama jitona fiébite; iere ie izíruigamié. Iiraicaiño ie jitó orede. Comeci facade: “Afémaci ñue íemo comécillano íena ñue íinoitiaioi; ie dáina uaina jeire óitiaioi,” daide.

⁷Mei íadi táijitagano dani afémaci úritiaioi: “Bímie níbai ie moo feci ra máínoitimie. Mai ie cai faa, ie mei cai náamatallena.” ⁸Ie jira íaioi llaitaca; íaioi titaca tíide. Ie mei ie abi raiñeno afénomona oni dotaca.

⁹Ie mei Jesús jicánote:

—¿Nie izói bie énie naama afe fiénidinona fínoite? Billano afe táijitagana títaite. Ie mei afe jíricore izóidino jiáie úiñoraimacimo fécaite.

¹⁰¿Jaiá Cuegáuaina nai facadóñediomoi? Afe uai bie izói daide:

Jofo níraíni oni fádoiéa nófie, ja ñuera jiáilliraina jaide.

¹¹Bie cai Ocuíraíma finoca.

Iere jamánomo ebire caímo cíoié.

Dínori Jesús úrite.

¹²Iemona Jesuna llaitáacadiaioi, llavéllena. Mei ja onódiaioiza, Jesús bie onóigafuedo íaioína uáitate. Mei íadi comínina jacíruillano, Jesús jetáñeno íena fiédiaioi. Ffiano oni jiáinomo jáidiaioi.

Gobierno íbátaga úcube cai íbállena Jesús llote

(Mt 22.15-22; Lc 20.20-26)

¹³Afe mei fariseo illáicomini afémacimona dáarie Jesumo orédiaioi. Daje izói Heródemo jáináidinomona orédiaioi, Jesuna úritallena, afe ie uaido taino íeri nitállena. ¹⁴Bimaci billano íena daidíaioi:

—Llófueraíma, onódicaiza jiáimaci ie lloga uai fínoñeno, o jaca uáfueña úrifiredio. Comini jínofene ciona izói riire jicánoñedio. Mei jiáífodo Juzíñamui lloga cai ñue illafue jífueñeno jino llófuetio. ¿Mei iere riíredillaíma ocuica úcube íemo fecáredicai, níbai fecánidicai? ¿Afe cai fecállifue figora, níbai figóñede? —daidíaioi.

¹⁵Mei íadi Jesús íaioi uáfodo úriñenafueña onode. Ie jira íaioína daide:

—¿Níbaí mei cue jánari táinona úritiomoi, cue llaitállena? Daa úcubetuni cuemo ati, cue eróillena, —daide.

¹⁶Afétuni atidiaioi. Afe eróillano Jesús íaioímo jicánote:

—Bie uíéco jana, ¿bu ie? Benomo cuega mámecei ¿bu ie? —daide.

Afémaci fairíotiaioi:

—Riíredillaíma ie, —daidíaioi.

¹⁷Iemo Jesús íaioína daide:

—Ríillaima ie raa íemo abido ine. Daje izói Juzíñamui ie raa íemo abido ine, —daide.

Afémacina ie dáiñari iere comeci jíáifoficaidiaioi.

Tíidino meine abido cáadena íllena jicánotiaioi

(Mt 22.23-33; Lc 20.27-40)

¹⁸Ie mei saduceo imaci dáarie Jesumo úrizaidiaioi. Bimaci tíidino meine abido cáallena lloñéidiaioi. Ie jira bie taino lloga rafue Jesumo jicánotiaioi. Nai jicánoñenia fueñe daidiaioi:

¹⁹—Llófueraima, Moisés jaiáimona caimo cuegáuai daide: Daa íima áiredimie ie úrue nai íñena llezica tíadi, ie ama afe ofaiño óite. Aféngomona daa jitó comúrede ie ama tíidimie íena. Daií daina mei jicánotiaioi:

²⁰‘Mei nauí siete dígade ámatiai cai cígimo ite. Nanóidimie áirede. Afémie jitónino tíide. ²¹Nanóidimie emodo ímie ie ama fecingo ote. Daje izói jitónino tíide. Daje izói nanóidiaillinoi emodo ímie afe fecingo uano jitónino tíide. ²²Nana afe siete dígamiai nanóidimie fecingo otíaioi. Afémacimona daa jitona comúñede. Afe ícoimo afe fecingo tíide. ²³Ie jira meine abido cáalliruiño íbumo afengo dúide? Mei siete dígamie daango otíaioiza, —daidiaioi.

²⁴Mei jira Jesús fairíote:

—Omoi onóñeno fieni comeci facádotiñomoi, mei Juzíñamui Cuegáuaina onóñediñomoi. Daje izói ie ríinona onóñediñomoi. ²⁵Mei tíidino meine abido cáaille llezica aina óñeitiaioi. Afe izói íaioi jíñaniaina ínretatañeitiaioi, mei monamo ite Juzíñamui abi imáciai izóitiaioiza. ²⁶Mei íadi tíidino meine abido cáallifue díbéñedo llogáfueña íñai facádoñediñomoi? Afefue Moisés cuegáñicomo ite. Aféruimo Juzíñamui Moísemo boode raroci cígido úrite. Bie izói íena daide: “Dáanomo Abraham íñoga Juzíñamuidícue, Isaac, Jacob díga, mei birui afémaci cue illánomo cue díga cáadiaioiza,” daií Juzíñamui daide. ²⁷Iemo Jesús nai daííoide: Mei ua íñéidino Juzíñamuiñedeza; mei íadi jíáifodo cáadimaci ie Juzíñamui. Daií bífueña omoi baitáñenia iere féiraitiñomoi, —Jesús ja díñomo daide.

Iere jamánomo íñorede caimo ocuica uai

(Mt 22.34-40)

²⁸Afe dáaruído ocuica uai llófueraíñimona dáamie Jesumo dúcide. Jesumo gairídino nana Jesús díga úrilla uaina afémie cacade. Daje izói Jesús ñue íaioi uaina fairíuana afémie cacade. Afe uai fairíuana fidíllano Jesumo jicánote:

—Nana ocuica uáimona, íñie iere jamánomo íñoreña? —daide.

²⁹Jesús ie uai ote:

—Nana ocuica uáimona bie iere finorede nánora uai: “Israel, mai omoi cácarei. Cai Ocuíraima Juzíñamui jaca daade. ³⁰Mei jira nana o comécido o Ocuíraima Juzíñamuina izírui. Daje izói o comécimo ite joreño diga izírui. Daje izói nana o ifo úrilla uaido íena izírui. Daje izói nana omo ite rínodo íena izírui.” Be niie nánora ocuica uai. ³¹Afe méifoide ocuica uai daje izói jóide. Afe uai daide: “Dama o abi o izíruilla izói, afe izói o aino ímiena mai izírui.” Jiáie ocuica uai izoide bie baimo ñede, —daide.

³²Iemona Ocuica uai llófueraima daide:

—Ie mei! Llófueraima, ñue daidio. O daina uafue. Uáfuena Juzíñamui daade. Afémie baimo jiáimiena ñede. ³³Daje izói afémiena nana cai comécido izíruillena ñuera. Ie llezica nana cai ifoci úrilla uaido íena izíruillena ñuera. Ie llezica nana cai comécimo itífuiaido íena izíruilla ñuera. Ie llezica nana caimo ite rínodo íena izíruillena ñuera. Daje izói cai abi ímiena dani cai abi izíruilla izói, afe izói íena izíruilla jitáirede. Bie izói cai izíruilla, aillo ráifide. Ua, nana fatá Juzíñamuimo fia fecaca rílleniai baimo ráifide, nana Juzíñamui ióbitallena jobaica rílleniai diga, —daide.

³⁴Iemona baitádimie izói afémie ie fairúa uaina cacáillano, Jesús íena daide:

—Juzíñamuimo dúillena ímiena íanori itio, —daide.

Afe mei jacíruillano buna jiáifuena Jesumo jicánoñediaioi.

¿Bu jitó Cristo? Jesús dama jicánote

(Mt 22.41-46; Lc 20.41-44)

³⁵Jesús gairíracomo llófullofuena llezica, comínimo jicánote:

—Onódiomoiza ocuica uai llófueraíni “Cristo David jitó” daiífirediaioi. ¿Nie izói daiírede? ³⁶Mei dama David Juzíñamui Joréñodo úrite; daide:

—Monamo ite cai Moo Juzíñamui cue Ocuíraimana daide: “Cue nabézimo rainai, o éoigamacina cue anáfenollíruimo,” daí David daide. ³⁷David Crístona “cue Ocuíraima” daíadi, ¿nie izói afe llezica Cristo ie jitona írede? —daide Jesús. (David emodo imácimona Cristo cómuide.)

Aféruido aillo comini, caimare Jesús úrilla cacáreizabitiaioi.

Ocuica uai llófueraíni fienu illafue Jesús jino comínimo llote

(Mt 23.1-36; Lc 11.37-54; 20.45-47)

³⁸Jesús llófullofuena llezica íaioina daide:

—Ocuica uai llófueraínimona abí omoi rairui. Afémaci árrera ñuera inícuero jítano comini uiécomo mácafírenana gáidiaioi. Afe llezica íaioi anamo comini fecáracuaimo ñue jacíruioicana íaioi uáiduana gáidiaioi. (Daje izói comini íaioi daináuai jíruillena gáidiaioi.) ³⁹Afémaci Juzíñamui uai llófueraimo ite ñuera ráiiranona raire jiáimaci uiécodo

jenófrediaioi. Afe izói comini iráiziracomo iráiziadi, afémaci iere ñuera ráiirano uiécodo maiñófrediaioi. ⁴⁰Afémaci fecínguai jofue naa íaioi raari bairófrediaioi; mei íadi comínimo jíáfodo afémiiai cóillena, are Juzíñamuimo úrioidiaioi, comini éoilla llezica. Afémaci iere jamánomo duere finócamacina jáitiaioi, —daide Jesús.

Dúerede fecingo fecaca úcube jamánomo ñuera

(Lc 21.1-4)

⁴¹Iemo Jesús Juzíñamuimo gairíracomo ráicana eroide. Ucube dotáranano uícomo ráiide. Comini afénomo úcube dótajillamo eroide. Iere ráaredino aillo úcubena dotádiaioi. ⁴²Bie llezica fecingo dúeredingo mena úcubetuni dótaibite. Bituni íaínguai ‘cobre’ ie; iere due ráifide centavo izoide. ⁴³Ie mei Jesús ie llófuegamaci jíirillano íaioina daide:

—Uáfuenta ómoimo lloticue. Bie dúerede fecingo úcube jóoneracojimo dotaca úcube, iere jamánomo jíáimaci afénomo dotaca úcube baimo jaide. ⁴⁴Nana jíáimaci úcube fiébide államona dotádiaioi, mei íadi afengo dúeredingo íadi, nana aféngomo ite úcube ie iga. Afengo güille óllena úcubena nana afengo ja dotaca, —Jesús daide.

Gairíraco uire júdaillea Jesús ie llófuegamacimo llote

(Mt 24.1-2; Lc 21.5-6)

13 ¹Jesús gairíracomona jino billa llezica, ie llófuegamacimona dáamie íena daide:

—Llófueraima, íbie iere ñuera nófiemo eroi! ¡Daje izói bie jofu áilluemo eroi! —daide.

²Iemo Jesús uai ote:

—Mai bie áillue jófuemo ñue omoi eroi. Benomo daje emódomo nófiena ffebiñeite. Nana oni júdaille, —daide.

Iirairui uécodo íitifuiai

(Mt 24.3-28; Lc 21.7-24; 17.22.24)

³Afe mei Olívona mameide ídumo jáidiaioi. Gairíraco uíeco díbenemo ite. Afénomo Jesús ráiidemo, Pedro, Jacobo, Juan, íemo Andrés báinino íena daidiaioi:

⁴—Nana bífuiai o daína júdaille zuíllaruina onóiacadicaí. Mai caímo llone. Nana bífuiai fúiacana ¿nie izói caina onótaite? —daidiaioi.

⁵Jesús uai ote:

—Bu omoi jífueñeillena, ñue abí omoi rairuiri. ⁶Aillo cue mámecido imaci abí jítano bíitiaioi. “Cristodicue” daínano bíitiaioi. Afémaci aillo comínina jífueitiaioi.

⁷Mei íadi aillo áinori ite fuiríllafuena, íemo jica ite fuiríllafue díga omoi fidíadi, omoi jacínaiñeno iri, mei afe daí íredeza. Mei íadi nai

firairuñedeza. ⁸Mei aféruimo daa nairai jiái náiraimo fuirízaite. Afe llezica dáazie jiáziemo jobáirizaite. Aféruillaído diga illánomo énie riire dócaite. Dáaruido aillo júbie diga éniiaído iite. Be aféfuiai comini duere zefuille táinia raa.

⁹Mei jira abí ñue omoi rairuiri, mei riire ocuídímaci gairíllanomo omoi úftiaioiza; Juzíñamui uai llófueriracomo ómoina fáziitiaioi. Cue ícoinia ríllaini úcomo ómoina óreititiaioi, jamánomo ríredillaini diga. Afe daíf cue dibénedo íaioimo úritiomoi. ¹⁰Mei firairui nai dúciñena llezica, cai jíllonafue uai nana náiraimo jino llóredeza. ¹¹Ríredillainimo omoi oreille llezica, omoi úrillifuemo raire úcomo comécido facáñeno omoi iri. Daje izói omoi comécillifuemo raire úcomo uibññoeno iri. Aféruimo Juzíñamui omoi ífomo úrilla izói, mai omoi daíri, mei dani omoi úriñeitiomoi; omoi comécimona Juzíñamui ie Ñuera Joreño úrite. ¹²Afe llezica dáamie nahí ie ámamo fiénidífue nítano jiáimiena ie fatátaite. Daje izói móotiai nahí ie jitótiaina fiénidífuedo izájitaitiaioi, íaioi titállena. Afe íbana íaioi jitótiai, nahí ie móotiaimo fiénidífue nítano íaioi fáite titállena. ¹³Cue ícoinia, nana comini ómoina éoillano iere íáruitiaioi. Mei íadi firairuimo jaícina Juzíñamuimo iere féitañeno finotímie jíllobicaite.

¹⁴Jaiái Juzíñamui uai jino llóraíma Daniel daa iere íáruiga raa dibénedo cuete. Afe íáruitaitaite raa nabene jofue júdaitaite. Afe fiénidífue na oruide raa Juzíñamuimo gairíracomo ite jeruícacomo jóonia llezica, Judea éniemo itino, ápera íduaímo botárediaioi. (Bibe facádimie mai ñue onoiri.) ¹⁵Aféruimo o jofu jinófene idamo omoi íadi, jofu eromo ite ráaniaina omoi uájññoeno iri; raire botari. ¹⁶Jacáfaimo táijidímie abido jofomo biñeno iri, ie íncuiruai óllena. ¹⁷Aféruimo ite ringóniai namóciredino iere duere zéfuitiaioi, aizíndiaioiza. Daje izói monoi jirode duera úrue llíidíngotiai duere zéfuitiaioi. ¹⁸Ie jira Juzíñamuimo omoi jicari, “Nóci illáruillaído caina botátañeno iri.” ¹⁹Bie izói duere zefuúlliruina jaca jaiái ífinide. Ua, Juzíñamui bínie fínuamona benomo afe izóidena íñede. Aféruillai méífomo afe izói íñeite. ²⁰Juzíñamui afe zúuredíruí are jóoneadi buna jíllñoeille. Mei íadi afémie nizécanona izíruillano íanori afe zúuredíruina afémie jóoneite. Are íñeite.

²¹Temona aféruimo dámie ómoina daííadi: “íErocai, benomo ite Cristo!” áemo íñoñoeno iri. Daje izói jiáimie daííadi: “Eroi, batínomo ite Cristo,” áfena íñoñoeno iri. ²²Mei uafue, aféruído aillo jífuertino bíitiaioi. “Crístodicue” dáíitiaioi. Daje izói “Juzíñamui dibénedo úriticai” daínano comínina jífueitiaioi. Afémaci cíorainina ráaniai fínoitiaioi, jiáie jacíredífuíai diga, comini jífuellena. Uafue, daje izói dama Juzíñamui nizécanona jífueacadiaioi, afémaci daíf jífuetareniadi. ²³Mei íadi mai ñue omoi comeci facáoiri; mei nana bífuiaína jae úcodo ómoimo llotícueza.

Monámona bite Nanoide Hima Jitó, Cristo meine bíllena Jesús lloste
(Mt 24.29-35, 42-44; Lc 21.25-36)

²⁴‘Te mei aféruillaído, zúurediruillai méifomo, jitoma duíbicaite. Fiui égañoñeite. ²⁵Monamo ite úcuai cócítiaioi. Afe llezica mona eromo ite ríino mozídino, mairíño jaillano dócaítiaioi. ²⁶Lemo nauí monámona bite Nanoide Hima Jitó Cristo meine abido cíocaite. Uíllie cígido biite; aillo ríino diga. Jamánomo ebírenafuedo biite. ²⁷Afe mei ie abi imácina óreite, nana ie nizécamací nana mona fuédamona gairítallena. Ua jamánomo jica ite ígobíai imácimona nizécano nana dáanomo atille. Daje izóí énie fueda imácimona nizécano nana dáanomo atílliaioi.

Nai ie llófuegamacimo llófuiano, íaioina daide: ²⁸‘Mai bie higuera amena rafue omoi onoiri. Afe higuera íbiai firuilla llezica fimona ánozillana onódiomoiza. ²⁹Daje izóí nana bie zúurediruillai zuíllana omoi cíoiadi, íirairui ánozillana onóitiomoi. Jae iere íanori ite. ³⁰Uáfúena ómoína dáitícue, afe illáruido itino comini nai tñíñenia, nana bifue zúite. ³¹Nana mona énie diga fúite, mei íadi cue daina uai jaca ninomo méidonide. Cue llua izóí zúite.

³²‘Mei íadi afe illfrúina buna onóñena. Daje izóí Juzíñamui abi imaci onóñediaioi. Ua afe izóí Juzíñamui Jitó aféruina onóñede. Dama cai Moo Juzíñamui onoiga.

³³‘Te jira, aferui dúcinana onóñediomoiza, mai ñue figo abina omoi onoiri. Afe llezica mai ñue omoi uíñori. Daje izóí Juzíñamuimo úrifireiri. ³⁴Cue meine billifue dámie jica jailla izoide. Afémie nai jáíñenia femo táijidinona ie jofo úíñotade. Illa dígamie dáarie táijillena igáiaioi. Lemo naze uíñoraíma jóoniano, íena riire ocuide, jofo uíñollena. ³⁵Afe izóí mai omoi abi onóicana uíñori, mei jofo naama billirui óñoñegaza. Nibai naufoilla llezica biite, nibai dáaferuimo, óñoñega. Nibai atava úrilla llezica, nibai jítiramo afémie biite; óñoñega. ³⁶Mai abi omoi onoiri, afémie raire bíadi, omoi iníllena ie cíóñeillena. ³⁷Omoína cue daina izóí nana comínina daidícue:

—Cue bíllemo abi omoi onoiri, —daide Jesús.

Comini Jesús llaitállena maméritiaioi
(Mt 26.1-5; Lc 22.1-2; Jn 11.45-53)

14 ¹Nai ménarui ite pascua ráfuemo. Afe rafue llezica afénomo ite comini íaioi pan fáitara jóoneño gúifirediaioi, mei aféruillai fáitañega pan gúifirenafue. Lletáriraini illaini ocuífafue llóraini diga Jesús jífuíado llaitállena jenódiaioi, ie titállena. ²Iadi daidíaioi:

—Íráizie ana íena llaitánde; áfemo comini ficire júfidoñeilleza,
—daidíaioi.

Ringo zióredijido Jesús ifona jillaide

(Mt 26.6-13; Jn 12.1-8)

³Jesús Betániamo ite. Simón jofomo ite. Afe Simón chíinaitimiena mameide. Güirácomo íaioi ráina llezica, daa ringo jamánomo ráifide ziórediji Jesumo jilláizaibite. Afe ziórediji duera alabastro daina nofici finoina ícítirumo ite. Afe ziórediji mámece nardo. Afeji jíáiena fáinega. Afengo afe ícítiru llaillano, Jesús ifomo áfeji totade. ⁴Afénoimo itínomona dámerie áferi rícaidiaioi. Dani conímana riire daidíaiói:

—¿Nibái mei bie ziórediji táinomo dotade? ⁵Afeji trescientos romano úcubetuni baimo fecárede, duéredimacina canóllena, —daidíaiói. Aféngomo rícaillano íáruitiaioi.

⁶Mei íemo Jesús daide:

—Mai aféngona fáicanocai. ¿Nibái mei aféngona áifedodiomoi? Bie cuemo afengo finócafue ñuera. ⁷Mei jii, duéredino jaca omoi cígimo íitiaioi. Omoi jítáiadi afémacina canórediomoi. Mei íadi cue omoi cígimo are íneiticue. ⁸Afengo ñue cuemo finórede raa cuemo fñuaibite. Jáímacei cue ráiájinena cue abimo zióredijina afengo cuemo jóniaibite. ⁹Uáfueña ómoína dáititue, náganomo bie éniemo comini jílluille uai jino llóiaídi, bie ringo cuemo finócafue jino llóitiaioiza, áfemona aféngomo úbicaifirellena.

Judas Jesús íena éoidimacimo izáijide

(Mt 26.14-16; Lc 22.3-6)

¹⁰Ie mei Judas Iscariote lletáriraini illaini dine úrizaide, Jesús afémacimo izájillena. Afe Judas, doce dígamie Jesús llófuega ímie. ¹¹Afe illaini Judas dáinana cacáillano, íóbidiaioi. Afe jira íena daidíaiói: “Jesús caimo o atíadi, úcubena omo íbaiticai.” Iemona Judas nie izóí Jesús íaioimo fecállena jenode.

Jesús íiraifuena güillafue

(Mt 26.17-29; Lc 22.7-23; Jn 13.21-30; 1 Co 11.23-26)

¹²Fáitañega pan rafue nanódiruimo oveja jiza fáfirediaioi, pascua ráfueño ríllena. Aféruimo jae dúcide. Aféruído Jesús llófuegamacei íemo jícanotiaioi:

—¿Ninomo pascua rafue uícodo cai fñuaillena óiacadio, afénoimo pascua ráfueño mameide güille cai güillena? —daidíaiói.

¹³Ie jira ie llófuegamacimona ménaillinoi óriano daide:

—Jófuemo jai. Dínoimo jainoi ícírudo úitimiena báitiomicoi. Iedo jairi. ¹⁴Afémie jofo jáillanomo, afeco náamana daíri: “Llófueraíma daide, ¿Ninomo ite cue güillino cue llófuegamacei díga? Dínoimo pascua

rafue llezica güíticai daide.” ¹⁵Jira afécona ómicoimo ácatajite, áillico. Caifóidicomo iite. Ja fuífide. Dinomo cáiena finori, —daide.

¹⁶Jira llófuega íaillinoi oni jaillano jófueмо dúcidiaillinoi. Dúciillano uícodo Jesús íaillinoina daina izói baizájidiaillinoi. Pascua rafue ja finódiaillinoi. ¹⁷Nauzáilla llezica, Jesús doce diga ie llófuegamaciri dúcidiaioi. ¹⁸Güirábanimo güitíaoimo Jesús íaioina daide:

—Uáfueña ómoina dáititue, daa ómoimona, cue diga güitínomona cuena fécaite, —daide.

¹⁹Jira afémaci zúucaidiaioi. Afe llezica dáamierie Jesumo jicánotiaioi:

—¿Nibai cue? —daide.

Jíaimie daje izói daide:

—¿Nibai cue? —daide.

²⁰Jira Jesús uai ote:

—Afémie daa ómoimona, bie doce dígamiedemona; ua cue birui diga dáajemona güitímacimona. ²¹Nanoide íima Jitódicueza Cuegáuai lloga iodo jáidicue; ua cue tñillinomo jáidicue. Mei íadi cue fecádimie, inii iere dúerena! Afe íima jócoñegana baimo ñue jaide, íadi jae comuide, —daide.

²²Güitíaoimo, Jesús pan llínota daide:

—Íere figura, —daide. Daina mei ditade. Ditada íaoimo fécajano daide:

—Mai omoi güi. Bie cue abi, —daide.

²³Iemo Jesús jiróracuri llínote. Afécuri vínona orútaga. Ie mei:

—Íere figura, —dainano íaoimo iite. Nana afécurimona áfeji jiródiaioi.

²⁴Iemo daide:

—Bie cue die; áfedo comue dájemo llínoga uai uáfueña daiíllena. Aillo nairai jíllollena cue die tóite. ²⁵Uáfueña ómoina daidicue, ja birufimona afe uva rao llizilla íji jíroñeiticue. Ua nágaruillaído Juzíñamui illáimana illirui nai biñena llezica jíroñeiticue. Aféruimo comóicana áfeji nane meine dáanomo jíroiticue, —daide.

Pedro Jesuna jáanuana Jesús uícodo llote

(Mt 26.30-35; Lc 22.31-34; Jn 13.36-38)

²⁶Juzíñamui rua íaioi rua mei, jino Olivo dainádumo jáidiaioi. ²⁷Iemo Jesús daide:

—Bie naio, iomo come éicitaila izói, méaicaillamona nana omoi cuena zóofeiomoi. Cuegáuai daide: “Ovejai úíñoraímana fáititue; fállemona ovejai oni rájjicaitiaioi.” ²⁸Mei íadi cáadimiena meine abído cue ille méifodo, omoi uíecomo Galiléamo jáititue, —daide.

²⁹Jira Pedro daide:

—Nana ona fáicanocaitiaioimo, jaca o fáicanocaiñeiticue, —daide.

³⁰Iemo Jesús uai ote:

—Uáfueña dáititue, bie naio atava ménacaiño nai úriñeniadi dacaiñoámani cuena jáanoitio, —daide.

³¹Mei íadi afémie iere afe íeñede úricana daide:
—O diga cue tíllena jitáiyadi, nai ona jáanoñeticue, —daide.
Nana daje izói daidíaiói.

Jesús Getsemanimo Juzíñamuimo úrizaide

(Mt 26.36-46; Lc 22.39-46)

³²Iemo güirácomona jino billano Getsemaní ibírimo dúcidiaíói.
Dinomo Jesús ie llófuegamacina daide:

—Bai bené Juzíñamuimo cue úrizaille llezica, benó omoi ráiri,
—daide.

³³Iemo Pedro, Santiago, Juan diga uite. Jesús ja zuure cácaide;
afémie aillo jaci cácade. ³⁴Jira daide:

—Cue joreño iere zúureficaide; afe zuufue tílla izói cue orede. Benó
omoi fiebi. Abí omoi onoiri, —daide.

³⁵Iemo Jesús jabo baife jaide. Dinomo éniemo bñjicaillano
Juzíñamuimo jicade:

—Nana bie cuemo jíriacade raa cúemona oni o oréreadi, mai oni oreri,
—daide. ³⁶Nai Juzíñamuimo úrioicana daide:

—Cue Moo, ómona nana finórede. Bie iere zuure facállinomona cue
zuitari. Mei íadi cue oíacana izói finóñeno iri, mei jííifodo o oíacana izói
finori, —daide.

³⁷Iemo daámani llófuegamaci diné jaide. Inídiaíoiimo dúcide. Pédrona
daide:

—Simón, ¿ja o inídió? ¿Jaca due jiza abí onóoicana uíñonidíó? ³⁸Abí
omoi uíñori. Juzíñamuimo úriri, fiénidifuemo omoi báiiñeillena. Uáfuenta
o joreño iere jíerede, mei íadi o abi náinide, —daide.

³⁹Iemona dáanomona nane, Juzíñamuimo úrizaide. Daje uáillaina daide.

⁴⁰Ie mei nane bítemo, ie llófuegamaci meine dáanomona inídiaíói. Daií
afémaci íniamo, Jesús íaíoina cíozaibite, mei íaíói uíji ínie ibáicaza. Íaíói
uai ollino íñede. ⁴¹Ja dacaiñoámani Juzíñamuimo úrillano bite. Billano
íaíoina daide:

—¿Mei nai birui inídiómoi? ¿Nai ocózinaidiómoi? Jae mai. Nanoide
hima Jitódicueza, mei íadi fiénidímacimo cue itábicaillaruímo ja dúcide.

⁴²Náidacai. Mai cai jai. Cue fecádímie ja bite.

Jesús llaitádiaíói

(Mt 26.47-56; Lc 22.47-53; Jn 18.2-11)

⁴³Ie llezica Jesús nai úritemo Judas dúcizaibite. Afémie doce
dígadímacimona. Afémieoíri aillo comini bitíaíói. Lloefai bigíniai diga
bitíaíói. Lletáriraini illáinimona bitíaíói. Dáarie bie comini ocuícufue
llófueraínimona éicomini diga bitíaíói. ⁴⁴Fecádímie Judas bimácimo
ónoítara nauí lloga. Daide:

—Cue ñitállimie ñímieite. Ie llaitari. Ñue maiano, ui, —daide.

⁴⁵Iemo Judas billano, Jesumo áinozillano uáidote:

—iLlófueraima! iLlófueraima!

Daí dainano ñitade. ⁴⁶Iemo Jesús llaitada, maiano, bitino íena uitíai.oi.

⁴⁷Afe llezica dínomo itínomona dáamie lloefai otá daa bitímie jefo

ñetade. Afe jefona ñetácámie lletáriraini illaíma jaíenici. ⁴⁸Iemo Jesús comínina daide:

—¿Meita meríriraimadicue izóí lloéfaillairi bigíniai diga cuena lláitaibitiomoi maiano cue uíllena? ⁴⁹Nágarui ómoiri Juzíñamuimo gairíracomo llófuecana iticue; íadi jaca cuena llaitañediomoi. Mei íadi bifue íficaide Cuegáuailai fuitállena, —daide. ⁵⁰Iemona nana llófuegamaci íena fáicanocaillano botádiai.oi.

Da Jesudo jáicaide jitócome botade

⁵¹Mei íadi da jitócome dama áillue iniroi jitada nai Jesús óodana jáicaide. Ie mei bitino íena llaitádiai.oi. ⁵²Mei íadi afémie jarire duíñuano aferoi íaioimo fainóicaide. Daí ñeta emuíroma jarire botade.

Jesús jicánodoillinomo uiga

(Mt 26.57-68; Lc 22.54-55,63-71; Jn 18.12-14,19-24)

⁵³Iemo judúuai lletáriraini caifóidillaímamo Jesús uitíai.oi. Afe llezica nana lletáriraini illaini, íemo éicomini, íemo ocuica uai llófueraini diga, dáanomomo gairírdia.oi. ⁵⁴Pedro, afe jamánomoidillaíma jofo abi ibírimo, óodana jicado jaide. Dínomo llaizíriraini diga ráiide; irai fuemo agaide abi uzíreillena. ⁵⁵Nana lletáriraini illaini jamánomomo ocuídímaci diga Jesumo fieni íai.oi facátallena uai nabáidino jenódia.oi, áfedo íena titállena. Mei íadi áfena baiñédia.oi. ⁵⁶Aillo íemo taino llotíai.oi. Iadi íai.oi táinofuiai jaícina jóobiñede. ⁵⁷Iemo dáarie caifo náidacaillano, afémiemo taino fiénidífue nitádia.oi. Daidíai.oi:

⁵⁸—Afémie dáinana cacádica: “Bie comini finoca gairíracomo júdaiticue, íemo daruíamani íllemona jíái gairíracomo comini finóñegaco abido níiticue,” daide, —daidíai.oi.

⁵⁹Mei íadi nane íai.oi lloga uai nabáillafuiai jaícina jóobiñede. ⁶⁰Iemo lletáriraini illaíma íai.oi cígimona jino náidacaillano Jesumo jicánote:

—¿O uai óñeitío? ¿Minica bie omo nitádia.oi? —daide.

⁶¹Mei íadi daa uai óñede. Iemona lletáriraini illaíma nane dáanomomo jicánote:

—¿O Crístodio? ¿Afe cai ñúefuena nitaca Juzíñamui Jitódioza? —daide.

⁶²Jira Jesús daide:

—Jii, ie mei. Nanoide Hima Jitódicue. Uire uáfuena cuena cóitiomoi. Ua rírede Juzíñamui nabézimo dínomo cue ráinaillana cóitiomoi. Aféruillaído mona ero uílliedo cue bíllana cóitiomoi, —daide.

⁶³Lletáriraini illaima jamánomo rícaillano icrillamona ie iniroi cúatajano daide:

—¿Nibái mei jiáie uai nabáiraima jítaiticai? ⁶⁴Ja Jesús ie uáillaido Juzíñamui dibénemo fieni úrillana cacádiomoi. ¿Omoi, nie izói íena daidíomoi? —daide.

Iemona nana íena titállena daidíai. ⁶⁵Iemo dámierie afémiemo túallaitiaoi. Afe llezica ie uíeco iníroina ibáillano, íena fatíai. Fájano daidíai:

—¡Mai bai! ¿Bu o faja? —daidíai.
Iemo llaitádino ie uíeco túcoidiaoi.

Pedro Jesús jáanote

(Mt 26.69-75; Lc 22.56-62; Jn 18.15-18,25-29)

⁶⁶Pedro ana jofo ibírimo ite. Iemo daa lletáriraini illaima canóringo afénomo dúcide. ⁶⁷Pedro irai fue agáillana cióillano, afengo afémiemo riire eroide. Iemona daide:

—O daje izói Nazarena ímie Jesús diga macáfiredio, —daide.

⁶⁸Mei íadi Pedro jáanuano daide:

—Aféfuena fidíñedicue. Minícado úritio onóñedicue, —daide. Daina mei afémie naze fuemo jino jaide. Iemo ítava úrite.

⁶⁹Iemona canóringo íena nane cíoillano afénomo itínona daide:

—Afe iima Jesudo jáidímacimona, —daide.

⁷⁰Mei íadi Pedro meine jáanote. Ja baido afénomo itino Pédróna nane daidíai:

—Uáfuenta. O Jesús imaci iédio. Galilea ímiedio. O úrilla afémaci úrilla izói jóoide, —daidíai.

⁷¹Ie jira Pedro : “Uáfuenta cue llóñenia Juzíñamui cue fáidoiteza,” daide. Dáanomo Pedro ie daina uai nabáillena Juzíñamui mámevido riire mámiano daide:

—Afe omoi úrillamiena onóñedicue, —daide.

⁷²Daií daina llezica atava dáanomo nane úrite. Iemona Jesús íena daináfue Pedro uíbicaide. Nano uícomo íena daide Jesús: “Atava ménacaiño nai úriñenia dacaiñoámani cuena jáanoitio.” Afemo comeci fácajano éeiaide.

Jesús onínellaima Pilátomo uitíai

(Mt 27.1-2,11-14; Lc 23.1-5; Jn 18.28-38)

15 ¹Afe jítiramo lletáriraini illaini íemo eicomíniri gairízaidiaoi, ocuica uai llófueraíni diga; ie emódomo naa jiáie jamánomoidillainiri. Gairíllano Jesumo íai. ²Jira Pilato jicánote: Maiga Jesús Pilátomo izájidiaoi. ²Jira Pilato jicánote:

—¿O meita judío illáimadio? —daide.

Iemo Jesús uai ote:

—iIe mei! Daií jaca o daina izóí, —daide.

³Iemo lletáriraini illaini aillo fiénidifuiyai afémiemo nitade. ⁴Jira Pilato dáanomo jicánuano daide:

—¿O uai oñéðio? ¡Cacai! Diga fiénidiuai omo nitádiaioi, —daide.

⁵Mei íadi Jesús uaina oñede. Afémie uai oñenamona Pilato fáigacaide.

Jesús ie tiállena uáfodo maméritiaioi

(Mt 27.15-31; Lc 23.13-25; Jn 18.38-19.16)

⁶Afe rafue ana naga fimónado comínimona llogámie llaitácamiéna Pilato zuitáfiredede. ⁷Come fatímie Barrabás jae llavéracomo ite, jiáie come fatímaci diga. Nano jiáiruido illaima dotátaruimo comini fatíaioi. ⁸Ja birui comini Pilátomo jícaibitiaioi. Billano Pilato íaioimo finófirena izóí ie finóllena jicádiaioi. ⁹Pilato uai ote:

—¿Judíuai Illaima ómoimo cue zuitállena jitáidiomoi? —daide.

¹⁰Pilato ja lletáriraini illaini Jesús úradoillafuedo fécajana fidide.

¹¹Mei íadi lletáriraini illaini nana comini jeire otímaci. Iaiioi úamona iere caillídímaci. Iaioina llófuétiaioi:

—Jesús ífomo mai Barrabás caimo zuitállena izire omoi jicari, —daidíaioi.

¹²Jira Pilato jicánote:

—¿Nie izóí oíacadiomoi omoi mamécamié Judío Illaima cue finóllena? —daide.

¹³Iemo caillfoicana uai otíaioi:

—¡Cruzmo íena corai! —daidíaioi.

¹⁴Jira Pilato daide:

—¿Nibái mei? ¿Afémie nie fiénidífue finode? —daide.

Nane dáanomo baimo caillfoicana daidíaioi:

—¡Cruzmo íena corai! —daidíaioi.

¹⁵Iemona Pilato nairai uíecomo ñue íacanamona, Barrabás zuitada orede. Iemo Jesús zechétajano llaizíritinomo izájide íena coráíllena.

¹⁶Ie mei afe onínellaima áilloco jofo ibírimo íena uitíaioi. Afénomo nana fuiríraini gairítatiaioi. ¹⁷Iemo ñue jáirede inícuiri, illaima íena, afémiemo jitádiaioi. Aferoi uállaima jítafiregaroi. Afe llezica ífo icuifoi eegi níinacuifoína íemo jitádiaioi. ¹⁸Jítajano janónaioicana riire íena uáidotiaioi; daidíaioi:

—¡Fígo o iri, Judíuai Illaima! —daidíaioi.

¹⁹Iemo rázido diga icaiño ie ífo butíaioi. Ie túallaitiaioi. Afémiemo caiñici ana dújullano jifánodoicana íena ebíruitiaioi. ²⁰Daií ie íaioi áífedua méifodo, afe illaima jítacaroi íemona duiñódiaioi. Dúíñuano dama íecuirona ie jitádiaioi. Ie mei afénomona jino íaioi uiga íena coráíallena.

Jesús coráiina*(Mt 27.32-44; Lc 23.26-43; Jn 19.17-27)*

²¹ Jesuna coráiaidiaioimo Cirene ímie Simón jinona jófue mo bite. Afémie Alejandro Rufo íaillinoi moo. Bitemo Jesús coráilibicina rocátatiaioi.

²² Iemo Jesús Gólgota maméidinomo uitíaiioi. Afe Gólgota jíaimaci uaido ífócorai Illánona mameide. ²³ Afénomo vino eríredíji diga jóonegana Jesús jirótatiaioi. Mei íadi áfena afémie jiróñede. ²⁴ Afe mei ja Jesuna coráidiaioi. Iemo fuiríraini onótaraji dotádiaioi, Jesús inícuuro íaioi máinuana onóillena. Iemona dájerize illa dígamie ie inícuuro uite.

²⁵ Jae jitoma caifo illa llezica Jesús coráidiaioi. ²⁶ Jesús coráigabicimo jíaie uai llotíbicina netádiaioi. Afébicimo nie íaifue ie fínua jira coraica, daí íaioi cueda. Bibícimo cuetíaioi: “Bímie Judíuai Illaíma.” ²⁷ Afémie diga mena meríriraíma íaillinoi coráidiaioi, dámie ie nabénemo, jíaimie ie jarífenemo. ²⁸ Jaiái Cuedáuai daí fúbicaide. Aféuai daide: “Afémie fiéndimacimo jaináitaga.”

²⁹ Afe iodo jáidino Jesumo fienu íritiaioi. Fuena iere riire íena zanódiaioi. Daidíaioi:

—Mai, cacai. O Juzínamui gairáico ana júdaitímiedioza. Daje izói daruíamani íllado abido afeco níitímiedioza. ³⁰ ¡Mai dama o abí jíllota! ¡Crúzmona ana bi! —daidíaioi.

³¹ Daí daje izói lletáiriraini illaini, ocuica uai llófueraíni diga, Jesuna janónaitiaioi. Dani conímana daidíaioi:

—Afémie jíaimaci jíllotate, íadi afémie dama ie abina jíllotanide. ³² Mei birui Cristo, Israel Illaíma ana crúzmona bíadi, áfena cai ciónamona afémie uaina ja uáfueña ínoiticaí, —daidíaioi.

Daje izói afémie diga coráicaiaillinoi fienu Jesumo íritiaioi.

Jesús tñilla*(Mt 27.45-56; Lc 23.44-49; Jn 19.28-30)*

³³ Jaíciri illa llezica nana énie jítireficaide. Dahoraámani fidi monáñede. ³⁴ Afe llezica Jesús riire cáilliano daide:

—Eloí, Eloí, ¿lama sabachtani? —afe uai dobáinuana daide: ¡Cue Moo Juzínamui, Cue Moo Juzínamui! ¿Níbái cue zóofetio? —daide.

³⁵ Dámierie afénomo itínomona áfena cacáillano daide:

—Cacarei, afémie Juzínamui uai jino llóraíma Elías jíirite, —daidíaioi.

³⁶ Iemona afémacimona dámie aizida fíillicide raa uájide. Erírede vínona riáitano, áfena ragüizi ícoimo jóonete, áfedo Jesús jirótallena. Daí ñeta, íemo ñuitade. Afe llezica jíaimaci íena daide:

—Ína jabe. Mai cai éroi, neca afémie Elías ana ólleza, —daide.

³⁷ Ie mei Jesús riire caillida tñide. ³⁸ Afe llezica Juzínamui gairáicomoo zebica jédaciede iniroi, dáfenedo caifófenemona ana cuájicaide.

³⁹Jesús anamo romano jabóidillaíma uíeco dibénemo naidaide. Ie cáilliana cacade. Ie tílla izóidena ciode. Cíuano daide:

—Uafue, bie iima Juzíñamui Jitó, —daide.

⁴⁰Dáanomo dáarie ringóniai jícana eróiediaioi. Iaiói cígimo ite Magdalena jofue ingo María, íemo Salomé, íemo jíáie María. Afengo Santiago José ei. Afe Santiago jofófene ímiena mameide. ⁴¹Bie ringóniai Jesudo jáicadino. Naui Galiléamo ie illa llezica, afémaci íena canódiaioi. Mei íadi bimaci baimo aillo jíáingotiaina, Galilea ingóniai afémiedo Jerusalem bitáioi.

Jesús abi raiáfomo jóoniaidiaioi

(Mt 27.57-61; Lc 23.50-56; Jn 19.38-42)

⁴²Ja nauízaide. Mei aferui ocózinaillarui uícodirui íllaza, comini íaiói jítaille raa finófrediaioi. ⁴³Jira José Pilátomo Jesús abi jícajide. Afe bie José Arimatea jofue ímie. Afémie caifóidillaímaíaimo iere jaináideza, ie mámece jica jalleide. Afémie Juzíñamui illáimana illíruina ñue uíñote. Afémie abi mámano jáicaiñeno Pilato illánomo jaide. Dinomo Pilátomona Jesús abi jícade. ⁴⁴Pilato ja ie raire tíllari fáigacaide. Jira jabóidillaíma uáidote íemo jícanollena meita uafue daiíllena.

⁴⁵Jabóidillaíma “Jíi” dáinamona Pilato fairíote Jesús abi José uíllena.

⁴⁶Jira José iere ñuera iníroi íbade. Iemo Jesús abi ana uáno, aféroido junide. Iemona idu ana nofíci ero raigácomo ite raiáfomo íena jóoniaide. Jóoniano raigaco áillue nofícina íbaide. ⁴⁷Magdalena ingo María, José ei María díga, afe raiánona cíodiainguai.

Jesús tídemona meine abído cáadimiena jaide

(Mt 28.1-10; Lc 24.1-12; Jn 20.1-10)

16 ¹Ocózinaillarui méifomo Magdalena énie ingo María, Santiago ei María, Salomé díga zíoji íbádiaioi, Jesús abi recuíllena. ²Jira semana nanóidirui jítiramo raiáfomo jáidiaioi. Afe llezica jítoma ja ciode. ³Iemo ringóniai dúciíllano conímana daidíaioi:

—¿Bu mei raiáfo uíeco íbaina nofíci cairi oni ñuitalle? mei afeci iere áillueza, —daidíaioi.

⁴Mei íadi érocaíllano raiáfo uíeco íbaina áillue nofíci oni jóoniana cíodiaioi. ⁵Iemo raiáfo ico eromo íaiói jáíllanomo jítócome nabézimo ráinana cíodiaioi. Afémie árecuiro úzerói jítáoide. Ieri iere jacínaitiaioi.

⁶Jira ringóniaina daide:

—Omoi jacínaiñeno iri. Omoi Jesús, Nazaret ímie naui coráicamie jenódiomoi. Mei íadi ja tídemona meine abído cáadimiena jaide. Benomo íñede. Afémie íaiói jóoniano omoi eroi. ⁷Ie mei Pédro mo naa jíáie llófuegamaciri llujíri. Afe bifue daiíri: “Omoi uícomo Galiléamo jaide. Dinomo ie dáina izói íena cíoitomoi,” —daide.

⁸Jira ringóniai raiáfomona botádiaioi. Fáigacaillano cuidíritiaioi. Iere íaioi jacíruillamona bumó lloñediaioi.

Magdalena énie ingo Maríamo Jesús cíocailla
(*Jn 20.11-18*)

⁹Semana nanóidirui monáiacana llezica, Jesús meine abido cáadimiena jaide. Afe mei fueñe Magdalena énie ingo Maríamo afémie cíocaide. Naui afémie aféngomona siete diga fiénide joríaí oni orede. ¹⁰Iena ciona mei, afengo Jesús diga naui jáicadinomo lluájide; afémaci nai zuure éenaitiaioi. ¹¹Afe Jesús meine caade íllana María íaioimo llote, mei íadi aféfuena cacáillano, áfena nai íinoñediaioi. Daje izói afengo “Iena cíodicue” daina uaina íinoñediaioi.

Jesús llófuegamacimona ménaillinoimo afémie cíocailla
(*Lc 24.13-35*)

¹²Bie mei, Jesús llófuegamacimona ménaillinoi jofue onimo mácajidiaillinoi. Mácajilla llezica Jesús jáífodo íaillinomo cíocaide. ¹³Afe íaillinoi jáíe llófuegamacimo abido lluájidiaillinoi, mei íadi daje izói íaillinoína íinoñediaioi.

Jesús ie uai oni llóllena orécamacimo ie uai jóonenocaide
(*Mt 28.16-20; Lc 24.36-49; Jn 20.19-23*)

¹⁴Afe jáíruido once diga llófuegamaci íaioi güiránomo ráiidiaioimo Jesús cíocaide. Íaioi comeci ríirena jira, íaioína lletade. Dáanomo íaioi íinoñena jira, íaioína lletade, mei afe íena cíódino íaioimo llógana íinoñediaioiza. ¹⁵Ie mei íaioína daide:

—Mai nágagobiaido bie jílloille uai nana comínimo jino omoi lluájiri. ¹⁶Afe uaina ínoitímie íemo báutizagamie jíllobicaite. Mei íadi afe uaina ínoñeitímie jílloñeno duere finócamiena jáite. ¹⁷Cuomo ínoitino bie onótarafuiai ínoitiaioi, afe lloga uai uafue daíllena. Cue mámecido fiénide joríaíredímie ite fiénide joríaí oni óreitiaioi. Uícodo ónoñega jáíe uáillaido úritiaioi. ¹⁸Daje izói titade jaio íaioi llaítada íaioína ainíadi, tíñeitiaioi. Jucúredíji íaioi jiróadi, iránitañeite. Afe emódomo, iráredimacimo íaioi onoi bitáadi, afe iráredino jílloitiaioi.

Jesús monamo jailla
(*Lc 24.50-53*)

¹⁹Afémacimo úrilla mei, cai Ocuíraíma Jesús fíaicana caífo monamo uiga. Iemo Juzíñamui nabézimo ráinazaide. ²⁰Ie mei ie llófuegamaci nágagobiaimo comini jíllona uai llocana uitíaioi. Afe dáamie, cai Ocuíraíma, íaioína canode. Afe llezica afémie íaioi lloga uaina cíofínina íaioi finócafuaído uáfuenta daítate; daje izói diga onótatífuaído uáfuenta daítate. Jae níie.